

Gavman bai no inap senisim Maining Ekt

James G. Kila i raitim

PNG SEMBA ov Mains na Petroleum i amamas long toktok bilong Praim Minista, Peter O'Neill olsem dispela gavman nau bai no inap kamapim nupela senis long Maining Ekt na bai larim disisen i stap long arapela palamen.

Praim Minista O'Neill i bin mekim dispela toktok long Mande, Desemba 5 taim em i opim namba 14 Maining na Petroleum Konperens long Sidni, Australia.

Mista O'Neill i tokim moa long wan tausen ol lain i bung long dispela konferens olsem gavman bai toktok gut wantaim ol lain long maining industri pastaim sapos wanem kain ol senis i laik kamap bihain.

"Mi laik tokaut stret long hia olsem bai no gat senis i kamap long Maining Ekt bipo long 2017 Nesenel Ileksen," Mista O'Neill i tok.

"Em bai gutpela olsem nupela palamen i ken lukluk long wanem nupela senis we i laik kamap long bihain em nupela palamen bai lukluk long en. Na mi laik tokaut klia olsem ol lain long maining industri bai kisim tok save pastaim long wanem ol senis i laik kamap," Mista O'Neill i tok.

Presiden bilong PNGCMP, Gereia Aopi i tok olsem industri bai wok klostu wantaim gavman long lukim olsem PNG i bihainim ol intenesenel lo bilong main-



Presiden bilong PNGCMP, Mista Aopi, senia vais president Peter Aitsi na vais presiden Richard Kassman long Sidni konfrens.

ing we em i gutpela long PNG, na bai go wantaim wol klas industri na bai i ken bringim invesmen i kam insait long kantri em olgeta stekholda na lokal komyniti i ken amamas long en. "Nau long dispela taim we i lukim PNG i go insait long hevi bilong ikonomi, em moabeta long go wantaim wanem ol lo we i stap nau long bringim kam insait ol nupela invesmen long in-

dastru," Mista Aopi i tok.

Em i tok olsem industri bai wok klostu wantaim gavman olsem poroman long lukim olsem risos industri tude i ken bringim nupela invesmen long kantri.

Em i tok moa olsem semba bai wok klostu wantaim gavman insait long pasin bilong wok-bung long lukluk long wanem ol hevi i bungim industri olsem

Maining Ekt, na senis long sait long takis em 2017 Nesenel Baset i tokaut long en bai kamap.

Mista Aopi i tok olsem industri i wanbel long kain pasin bilong wok wantaim long lukim gutpela bilong tupela sait wantaim.

"Wanem samting mipela i laikim em gutpela polisi na ol lo we i ken sapotim gro bilong ikonomi," Mista Aopi i tok.

PNGCMP i bilip olsem ste-

bol o gutpela ran bilong gavman polisi na gutpela invesmen em gutpela long gro bilong PNG risos sekta.

"Stabiliti long gavman na ol lo bilong maining nau i wok long karim kaikai, na dispela i lukim gutpela gro bilong PNG risos sekta long taim prais bilong ol komoditi i bin antap namel long 2003-2012." Mista Aopi tok.

Insait:

Vota rejistresen stat long NCD-**P2**

Repsol sponsaim tupela wokmanmeri bilong Kumul

Petroleum - **P3**



40 pesen oil na ges tasol ol i panim - **P4**

P'nyang LNG projek bai kirap long 2018-19 - **P4**



Ileksen
apdet na we bilong enrol - 13,14,15 na 16...



Wasa Rice 200g
Em Skel Ya
GROWN FOR THE PEOPLE OF PNG



Vota rejistresin stat long NCD

Aja Potabe i raitim

ENROLMEN bilong ol elijibel vota insait long NCD i stat pinis taim PNG Electoral Commission (PNGEC) i mekim ol wok redi long ranim Nesenel Ileksen long yia 2017.

Dispela em i laspela vota enrolmen program bilong kantri taim PNG bai go insait long Nesenel Ileksen long Jun neks yia.

Ol arapela provins i mekim vota enrolmen na ilektoral rol apdet program pinis, na NCD i kamap laspela provins long pinisim wok apdet bilong ilektoral rol.

Ol manmeri husat i abrusim 18 yia krismas pinis na i stap long mak bilong vot long Nesenel Ileksen i mas putim nem bilong ol long dispela vota enrolmen fom long larim nem bilong ol i stap long Ilektoal Rol bilong 2017.

Stat long las wik Trinde, moa long 800 enrolmen ejen long NCD i bin statim wok bilong ol long kisim nem bilong ol manmeri husat inap long vot.

Ol dispela enrolmen ejen i bai go aut long 12-pela wod insait long Pot Mosbi siti na apdetim NCD votas rol insait long tupela wik.

Ol manmeri i stap long Pot Mosbi mas painim ol enrolmen tim husat i stap klostu long eria bilong

ol na i mas sekim na givim nem bilong ol.

Olgeta enrolem ejen bilong tripela ilektoret insait long NCD – Moresby North East, Moresby North West na Moresby South – i bin bung long Jack Pidik Park long las wik Trinde moning long kisim toktok i kam long Ilektoal Komisin.

Mausman John Kalamoroh, husat i makim maus bilong Sif Ilek-

toral Komisina, Patalias Gamato, i tok welkam long ol enrolmen ejen.

Mista Kalamoroh i tok welkam long ol nupela enrolmen ejen, na tokim ol long bihainim lo stret long mekim wok bilong PNGEC.

“Yupela i nau kamap wok manmeri bilong PNGEC, na mipela laikim yupela long mekim gut ol wok bilong yupela,” Mista Kalamoroh i tok.

Polye: Daunim K10, 000 nominesen fi

Aja Potabe i raitim

OPOSISEN Lida Don Polye i no wanbel long PNG Electoral Commission (PNGEC) i apim mani mak bilong nominesen bilong ol kendidet husat bai sanap long 2017 Nesenel Ileksen.

Mista Polye i autim dispela toktok long Trinde long dispela wik long Pot Mosbi. Mista Polye i no wanbel long Gavman i laik yusim PNGEC na apim mani mak bilong nominesen fi.

Em i autim dispela toktok taim PNGEC i autim plen long sasim K10, 000 long ol wan wan kendidet husat i laik sanap long nesenel ileksen.

Mista Polye i tok dispela mani mak bai no inap helpim planti ol manmeri long yusim demokratik



OPOSISEN Lida Don Polye i no wanbel.

laik sevim pipel na sevim kantri. Tasol mi no wanbel long dispela pasin bilong PNGEC long apim nominesen fi.

“Dispela nupela plen bai kamapim planti hevi na birua bikos ol manmeri husat i laik sanap long ileksen, tasol i no gat mani long baim K10, 000 nominesen fi, bai ol i tingting long bagarapim ileksen,” Mista Polye i tok.

PNGEC i bin tok ol bai apim mani mak bilong nominesen fi i go antap long K10, 000.

Praim Minista Peter O'Neill i wanbel long dispela plen bilong PNGEC.

Mista O'Neill i bin tok dispela mani mak bai helpim ol wan wan na trupela kendidet tasol long sanap long ileksen.

rait bilong ol long sanap long Nesenel Ileksen.

“PNGEC i mas larim ol manmeri bilong dispela kantri i ran long ileksen. Em i rait bilong ol pipel bilong dispela kantri long sanap long ileksen.

“Gavman na Ilektoal Komisin i no ken pasim tok na kamapim ol lo long

stopim ol pipel bilong yumi long sanap long Nesenel Ileksen.

“Sapos wanpela ai pas man, lek nogut, o wanpela yangpela man husta i abrusim 25 yia krismas, i laik sanap long Nesenel Ileksen, larim ol i sanap.

“Bikpela samting ol i gat gutpela lidasip kwaliti. Ol i

Sekyuriti plen bilong NCD Ilektoal apdet stap pinis

Aja Potabe i raitim

SEKYURITI plen bilong helpim ol enrolmen ejen bilong PNG Electoral Commission (PNGEC) long National Capita District (NCD) i stap pinis, wanpela senia wokman i tok.

Ileksen Menesa bilong NCD, Terence Hetinu, i tok NCD Ilektoal Opis wantaim ol polisman long Boroko i wokbung wantaim na i kirapim wanpela sekyuriti plen long bihainim.

Mista Hetinu i tok bosman bilong polis long NCD, Superintendent Ben Turi, i wanbel long dispela sekyuriti plen, en em i givim tok orait long ol polisman long Boroko polis stesin i ken helpim ol.

“Yupela ol enrolmen ejen bai wok aninit long sekyuriti bilong ol polis manmeri. Ol polis bilong yumi long Boroko bai givim sekyuriti na helpim yupela sapos birua o hevi i painim yupela,” Mista Hetinu i tok.

Em i tokim ol enrolmen ejen

bilong PNGEC, husat bai mekim laspela wok apdet bilong Ilektoal Rol bilong NCD, long mekim wok gut bikos polis bai stap stendbai long helpim ol.

Long las wik Trinde, ol enrolmen ejen long NCD i statim wok apdet long tripela ilektoret - Moresby North East, Moresby South na Moresby North West – insait long NCD.

Moa long 800 enrolmen ejen nau i wok long go raun insait long 12-pela wot long NCD na apdetim ilektoral rol long redim ol manmeri long Nesenel Ileksen long 2017.

Mista Hetinu i tok NCD Ilektoal Opis bai putim mobail fon namba bilong ol wan wan tim lida insait bilong ol enrolmen ejen long CUG fon na netwok bilong PNGEC.

“Sapos wanpela hevi o birua i kamap, ol tim lida i ken kolim mipela long NCD Ilektoal Opis o ol i ken kolim ol polisman na toksave long ol,” em i tok.



MiCash

**GET A
MICARD
OR
MICASH
ON YOUR
MOBILE**



**IT'S YOUR
CHOICE!**

www.microbank.com.pg



MiCard

Sonk tok tenkyu long Repsol

Aja Potabe i raitim

MENESING Dairekta bilong Kumul Petroleum Holdings, Wapu Sonk, i wanbel long Repsol SA i sponsaim tupela yangpela wok manmeri bilong KPH long go stadi long Madrid, Spain.

Oil na ges kampani bilong Spain, Repsol SA, i bin sponsaim joilojis meri Elliona Maso na petroleum ensinia Zechariah Yakap, i go skul long Spain long neks yia.

Mista Sonk i tok tenkyu long Repsol i sponsaim tupela wok manmeri bilong KPH i go stadi long kisim masta digiri long oil na ges eksploresen na prodaksen long Centro de Formacion de Repsol long Spain.

"Em i namba wan samting long salim ol yangpela wok manmeri PNG i go skul long ovasis long kisim save na ranim dispela nesenel oil kampani (NOC) bilong yumi," Mista Sonk i tok.

Em i tok ol i bihainim plen bilong KPH long salim ol wok manmeri i go skul na kisim moa save long oil na ges indastri.

"Kumul Petroleum Holdings i laik strongim skul bilong oil na ges long PNG, na mipela i



Menesing Dairekta bilong Kumul Petroleum Holdings, Wapu Sonk.

kirapim pinis Kumul Petroleum Academy long Pot Mosbi," Mista Sonk i tok.

Em i tok Kumul Training Academy i wok long skulim ol oil na ges teknikel lain long kisim save long oil na ges indastri.

KPH i gat 16.57% patisipet-ing intres long PNG LNG Projek na dispela i mekim KPH i kamap namba 3 bikipela join vensa patna bilong PNG LNG Projek.

KPH em i nesenel oil kampani bilong PNG na gavman i kamapim wanpela lo long larim KPH i bosim na ranim olgeta oil na ges asset bilong kantri i stap long han bilong KPH.

Repsol sponsaim tupela wok manmeri bilong Kumul Petroleum

Aja Potabe i raitim

BIKPELA oil na ges kampani bilong Spain, Repsol SA, i sponsaim tupela wok manmeri bilong Kumul Petroleum Holdings (KPH) Limited long go mekim feta stadi.

Repsol i sponsaim Elliona Maso na Zechariah Yakap, husat i bin wok aninit long greduet developmen program (GDP) long tupela yia.

Mis Maso em i jiologis, na Mista Yakap em i petroleum enjinia. Tupela yangpela manmeri ya i wok wantaim KPH aninit long GDP.

Wantaim helpim bilong Repsol, Mista Yakap na Mis Maso bai go stadi long masta digri long Spain long Janueri 2017.

Repsol i bin kam insait long PNG long Me 2015 taim ol i bin baim Talisman Energy.

Long PNG, Repsol i gat 12 oil na ges fil, na 10 laisens wantaim bikipela sais eria Wsten Papuan basin.

Repsol i gat ges fil long Westen Provins na dispela i lukim Repsol i kamap opereta bilong PDL10 Stanley



Mausman bilong Repsol, David Lester, Zechariah Yakap, Elliona Maso na Menesing Dairekta bilong KPH, Wapu Sonk.

Gas Fil.

Repsol i gat bikipela intres long PRL 21 long Ketu / Elevala Gas Fil.

Bihain long Repsol SA i baim Talisman Energy bilong Kanada long yia 2015, Eksploresen na Prodaksen Menesing Dairekta bilong Repsol, Luis Cabra, i bin kam raun long PNG na bungim Praim Minista Peter O'Neill.

Long dispela miting bilong Mista Cabra wantaim Praim Minista O'Neill,

Mista Cabra i bin tok Repsol bai helpim ol wok manmeri long PNG oil na ges indastri long stadim masta digiri long oil na ges eksploresen na prodaksen long Madrid.

Mausman bilong Repsol long PNG, David Lester, i tok Repsol nau i bihainim dispela tok promis bilong bikipela bosman bilong ol.

"Mipela nau i bihainim dispela tok promis bilong bosman bilong Repsol na i laik salim ol wok manmeri i

go skul long Madrid long kisim moa save long oil na ges indastri.

"Mipela i wanbel long larim kampani i sponsaim ol sumatin na ol wok manmeri PNG i go skul long Madrid long Spain.

"Save ol i kisim long hap bai helpim bihain taim bilong oil na ges indastri long PNG, na mi amamas long lukim dispela tupela yangpela wok manmeri bilong KPH i go skul long Spain," Mista Lester i tok.

Boroko Maket Bois i gat asosiesen

Josiah Ururu Kana i raitim

WANPELA gutpela de tru i bin kamap long laip bilong ol asples yut bilong Boroko Wod 5 eria bilong Pot Mosbi Notls ilektoret long Nesenel Kepital Distrik long las wik Trinde 30 Novemba.

Long dispela de ol yut bilong Boroko Wod 5 i amamas long lukim lokal Memba bilong Palamen, Labi Amaiu i lonsim wanpela asosiesen bilong ol yut boi we i no gat wok mani tasol ol i save stap nating long Boroko eria. Dispela asosiesen em ol i kolim long, Borok Maket Boi Asosiesen na ol i bin

lonsim long Apex Pak, klostu tasol long Boroko Tabari Bisnis Senta.

Long dispela taim tu em Reveren David Siga bilong Yunaitet Sios i bin stap long pre long nupela asosiesen na tu Asisten NCD Polis Suprintenden, Opai i bin stap long witnesim kamap bilong dispela nupela asosiesen bilong ol yut boi.

As tingting bilong dispela grup em long bungim ol lokal yut bilong Wod 5 eria bilong Boroko insait long wok bilong kisim ol gavman sevis na sosel na ikonmik wok bilong strongim ol yut na long rausim tingting bilong ol long mekim ol raskol pasin olsem long

bagarapim ol samting bilong ol narapela lain o pablik, pulim bek na sekim poket bilong ol pablik manmeri, dring bia na smok nogut, na olgeta narapela kain pasin bilong brukim lo.

Long taim bilong opim dispela asosiesen, Mista Amaiu i mekim gutpela toktok bilong bringim krai long bel na tu long givim gutpela tingting long wanem samting ol yangpela boi i mekim long tingting bilong ol yet we bai dispela grup i bringim gutpela senis long laip bilong ol.

"Mi save olsem laip long siti em i hat tru na planti taim sosaiti i

save tingting nogut long ol strit mangi na ol i save daunim ol na sakim ol i go long sait, olsem na ol i save wokim ol pasin bilong brukim lo long traim long helpim ol yet. Planti taim ol proposol bilong gavman i save pundaun," Mista Amaiu tok.

"I no bin gat ol pletfom bilong wok kamap i bin stap bipo. Tasol tude mi sanap wantaim gutpela tingting na mi gat bikipela rispek long wanem samting ol Boroko Maket Boi i mekim," em i tok.

Mista Amaiu i tok moa olsem em i sori long ol na i tok olsem, em tu i bin stap long Boroko long 1992

na em i save lukim wanem kain hevi na hatwok ol yut bilong Boroko i bin save gat bikos i no gat man i givim stia long ol, olsem lidaman bilong ol.

Em i tok olsem dispela de i makim wanpela impoten taim long laip bilong ol Boroko yut na em bai givim 100 pesen sapot long kamapim na strongim yut bilong Boroko.

Bihain long ol toktok bilong en, Mista Amaiu i tokaut olsem em i givim tupela damp trak long ol Boroko Maket Boi wantaim K30,000 long stat long mekim ol wok bilong ol.

BSP PERSONAL LOAN
Visit your nearest **BSP Branch** today to apply.

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval

Make your Christmas wishes come true...

WE ARE BSP

www.bsp.com.pg

40 pesen oil na ges tasol ol painim

James G. Kila i raitim

MAK OLSEM 40 pesen bilong oil na ges aninit long graun long Papua Niugini tasol em ol i painim na moa i stap yet.

Insait long dispela mak we ol kampani i painim, 15 pesen tasol em ol i kisim na redim na ekspotim o salim, na 25 pesen em ol i no redim yet long salim olsem komesal prodak.

Presiden bilong PNG Semba ov Mains na Petroleum, Gereia Aopi i tokaut long dispela wik Mande taim em i opim Namba 14 PNG Maining na Petroleum Konferens long Sidni, Australia.

Mista Aopi i tokaut olsem moa wok eksploresen i stap yet

long painim moa oil na ges risev o eria long PNG na dispela em bikpela wok tru na bai nidim planti ol bikpela hevi masin.

"Ol kampani no save wanem hap long painim oil na ges inap ol i kisim olgeta data o infomesen wantaim mep bilong eria, ol sempo bilong wok, nois insait long graun na ol arapela infomesin pastaim nau bai drilling wok bai kamap.

"Olgeta dispela i nidim bikpela invesmen. Bai i gat pret long yusim mani bikos ol i no klia tumas olsem i gat oil na ges i stap o nogut, na wanem wok ol i wokim em mas sapotim wok bilong drilim wel i mas kamap, na

dispela em hatpela wok tru," Mista Aopi i tokaut.

Em i tokaut olsem sapos nogat eksploresin drilling i kamap, bai ol kampani i no inap save olsem ges na oil i stap aninit long graun o nogat.

Mista Aopi i tokaut olsem long nau yet PNG i stap olsem gutpela ples we ol kampani i go het long karimaut ol wok eksploresin o wok painimaut long oil na ges bikos mani ol i yusim em daunbilo, na i no bikpela mani tumas olsem pastaim long 2014 bipo long oil prais i pundaun i go daunbilo tru.

Em i tokaut olsem nau long dispela taim we oil prais i daun-

bilo, ol lain kampani husat i laik wokim eksploresen o painimaut ples we oil n ages i stap long en i mas karimaut gutpela ol plen na bungim na redim gut ol infomesin bipo long ol i statim eksploresin drilling.

Mista Aopi i tokaut tu olsem PNG gavman tu wantaim ol dipatmen i lukautim oil na ges i mas sapotim ol nupela eksploresen kampani wantaim ol teknikal infomesen na tu helpim long sait long fainens long ol kampani i ken karimaut wok eksploresen na painimaut stret sapos oil na ges i stap long wanem eria, na sapos ol i ken dril o nogat.

Maining na petroleum invesmen strongim PNG ikonomi

James G. Kila i raitim

MAINING na petroleum sekta invesmen long PNG long dispela yia bai bringim bai bringim moa long K19 bilien. Dispela i soim olsem maining na petroleum sekta i wokim dispela helpim tru i go long ikonomi bilong PNG.

Presiden bilong PNG Semba ov Mains na Petroleum, Gereia Aopi i tokaut long dispela long Mande taim em opim namba 14 PNG Maining na Petroleum Konferens long Sidni, Australia.

Mista Aopi i tokim moa long wan tausen deleget i kamap long konferens makim 16-pela kantri olsem maining na petroleum risos indastri bai stap yet na go het olsem baksait bun bilong PNG ikonomi long bringim planti bilien Kina long sapotim baset bilong Gavman.

Dispela indastri tu save

givim planti tausen wok, trening, bisnis developmen na stretim sosel impruvmen long sait long helt na edukesen.

Em i tok long dispela taim we ikonomi bilong PNG i wok long bungim hatpela mani hevi, bikpela samting nau em long was gut na lukautim ol bikpela projek i stap long kantri na wanem ol invesmen ol i bringim i kam long kantri.

Mista Aopi i tok PNG Treseri Dipatmen i tokaut pinis olsem i gat nid long go het long lukautim gro bilong maining na petroleum sekta long PNG

Mista Aopi i tokaut olsem maski namba bilong maining na petroleum eksploresen wok long PNG i go daun bikos long hevi bilong wol maket prais, i gat gutpela sain tu i stap kamapim gut gol prodaksen long Lihir na Simberi gold main long Nu Ailan provins, na tu PNG LNG projek i kamap olsem

namba wan tru long kirap bilong en insait long wol.

Em i tok aut tu long ol spesel maining lis aplikesen bilong Frieda Kopa na Wafi-Golpu projek, we sapos tokorait i kamap long ol bai lukim ol i joinim Ok Tedi Maining olsem wanpela namba wan kopa na gold produsa long wol.

Em i tokaut olsem indastri aninit long PNG Semba ov Mains na Petroleum bai go het yet long sapotim gavman wantaim ol lo bilong indastri long promotim gro bilong indastri.

Mista Aopi i tok olsem indastri bai wok strong long sapotim ol wok bilong gavmkan long kamapim lo o lejislesen we i wankain o bihainim intanesenel stendat we i ken pulim invesmen i kam long risos sekta na bai sapotim ikonomik developmen bilong PNG na helpim ol stekholda insait long kantri.

ExxonMobil PNG patna wantaim Rotary Against Malaria

WANPELA wok patnasip i kamap namel long ExxonMobil PNG na Rotary Against Malaria long givim aut moa long 3,900 Insecticide Treated Mosquito Nets (LLINs) insait long PNG LNG projek eria.

ExxonMobil PNG i putim mani K80,500, long ol bet net bai i go long ol provins bilong LNG olsem Hela, Galp na Sentral long ol hap we malaria i wok long

bagarapim na kilim ol pipel.

"Olsem wanpela bikpela emploia na investa long Papua Niugini, mipela i lukim wanem kain bagarapik sik malaria i save kamapim. Mipela i lukim hevi long laip bilong ol wokman na wokmeri bilong mipela na ol famili na komyuniti bilong ol," ExxonMobil PNG Menesing Dairekta, Andrew Barry i tok.

"We bilong yusim ol

bet net i gat marasin em i gutpela we long stopim moskito long kaikaim ol manmeri na pikinini. Mipela i tingting olsem ol dispela bet net bai helpim long daunim ol namba bilong ol lain i save kisim sik malaria na ol famili bai fri long sampela ol hevi we i save kam wantaim sik malaria," Mista Barry i tok.

Rotary Against Malaria Projek

Menesa, Tim Freeman i tok stat long taim LLINs i bin kamap long PNG long 2006, wok bilong sik malaria i bin go daun moa long 70 pesen long planti hap bilong kantri.

"Long planti hap bilong hailans, malaria i luk olsem em i go pinis. Tasol yumi mas givim yet ol LLIN na malaria bai i no ken kam bek gen na kamapim hevi," Mista Tim i tok.

James G. Kila i raitim

WOK konstraksen bilong P'nyang likwideit netsurel ges (LNG) projek long Westen provins bai stat long 2018 o 2019.

Tasol gavman i tok tok yet wantaim divelopa, ExxonMobil, long nupela ol wok plen na rot long kirapim projek long dispela ges developmen.

Tresera Patrick Pruaitch i tokaut long dispela long Mande long namba 14 Maining na Petroleum Konperens long Hilton Hotel long Sydney, Australia.

Mista Pruaitch i wantaim lukluk bilong en long projek pastaim, ating ol i inap long bihainim narapela rot sapos ol i save olsem prais bilong ol n ages wantaim pundaun, tasol abrus na ol i wantaim bikpela baset sapot.

Em i tokaut olsem ol dinau PNG i bin kisim long yia 2014 na 2015 inap long stap daunbilo, bikos long dispela taim gavman i wok long bungim moa dinau insait long 5-pela yia em i stap long pawa.



Tresera Patrick Pruaitch

Mista Pruaitch i tok tu olsem ino bin laik long dinau na peim A\$1.2 bilien o samting olsem K3 bilion long baim 10 pesen sea long Oil Search kampani, sapos em i bin save olsem prais bilong oil na ges bai go daunbilo tru long dispela taim.

"Nogat man i save olsem prais bilong sea wantaim Oil Search bai pundaun long A\$8.20 long taim bilong baim i go daunbilo olsem A\$7 long wan wan sea. Pastaim long en sea prais i bin stap

antap moa long A\$9," Tresera Pruaitch i tok.

Tasol, Mista Pruaitch i tok save long ol lain long konferens olsem gavman i stap strong yet na i ken go het long wok bilong en maski olsem dispela kain samting i bin kamap.

Mista Pruaitch i tokaut long ol lain long konperens olsem pablik mani o fainens bilong PNG bai stap strong yet, tasol insait long narapela 10-pela yia i kam ol mas taitim strong rot long yusim mani gut.

Em i tok long nau yet, plen bilong gavman em long pinisim wok long ol polisi bilong en inap long yia 2020 we bikpela lukluk bilong gavman em long kamapim baset we i balens na tu, bai mas gat strongpela kontrol long rot bilong yusim mani.



Palamen Memba bilong Pot Mosbi Notls, Labi Amau wantaim Siaman bilong Boroko Maket Boi Asosiesen Inc. Robert Kimai i holim na soim setifiket bilong Asosiesen.

Poto: Josiah Ururu Kana.



PIH Saveman *Nias*

"I kam long Pacific International Hospital Port Moresby"

Ph: 311 3000 and 799 88000 Website: www.pihpng.com

PIH Celebrates World AIDS Day 2016

Hands Up for #HIVPrevention "Count me In"



PIH also put its best foot forward by actively participating in World AIDS Day – both at the Jack Pidick Park in association with NACS and also independently at the Vision City mall where it disseminated information about AIDS in a fun and light-hearted manner by conducting a "Write the best original Slogan Contest" where 20 winners were given free T-Shirts.

3rd December 2016, Saturday.



Girl Power towards the fight against AIDS – "GENDER EQUALITY"



PIH Outreach Program to Alukuni Village.

The PIH Team of 5 were there from 10:00 AM to 5:00 PM, meeting more than 70 patients and giving away free medicine. People from nearby villages also walked down to take benefit from this Outreach Program.



- PIH, 3 Mile Town
- Vision City Mall
- Waterfront Food World

20% Discount

Designer eye wears to make you look good and feel good

upto 20% discount*
on branded sunglasses
till stocks last

Call 7031 8606
eyecaremanager@pihpng.com

ExxonMobil PNG na PNG Tribal Foundation helpim PMGH

EXXONMOBIL PNG Limited na PNG Traibel Faundesen i helpim tupela bikpela haus sik long kantri, Pot Mosbi Jeneral Haus sik na Angau Memoriel Haus sik long Lae, wantaim 4-pela 40 ft kontena i pulap wantaim ol medikal saplai na ikwipmen long pinis bilong las mun.

Wantaim helpim bilong meri bilong Praim Minista, Misis Lynda Babao O'Neill dispela tupela oge-naisesen i givim ol dispela kontena, tupela long wan wan haus sik.

Sif Eksekutiv Opisa bilong PMGH na Angau Memorial Haus sik i bin helpim ol tupela oge-naisesen long sekim ol medikal saplai na ol ikwipmen we tupela lain i givim long ol haus sik.

Tupela kontena i go pinis long PMGH na Angau Memoriel Haus sik bai kisim tupela bilong en tu pastaim long dispela yia bai pinis. Ol dispela medikal saplai i bin kam long Yunaitet Stet long oda bilong Traibel Faundesen long wok patna bilong ol, C.U.R.E.

CEO bilong Pot Mosbi Jeneral Haus sik, Grant Muddle na ol tim bilong em i wok hat tru long senisim ol sevis insait long bikpela haus sik bilong kantri na ol dispela medikal saplai i helpim em long dispela we.

Mista Muddle i tok, "Dispela helpim bilong ExxonMobil na PNG Traible Faundesen i kam gut long dispela rot long helpimmipela we mipela sot long saplai."


Ol medikal saplai long Lae bai helpim long wod bilong ol pikinini wantaim ol kain ikwipmen olsem inkubeta o hot bet bilong ol bebi i kamap bipo long taim bilong ol stret.

CEO bilong Angau Haus sik Chris Kenyhercz i tok, "Sapot we Angau Haus sik i kisim long ExxonMobil PnG na PNG Traibel Faundesen em i mipela i amamas long kisim. Mipela i save wok strong long helpim ol pipel bilong Lae na ol narapela husat i kam long haus sik."

EMPNG i putim mani long bringim ol 4-pela medikal kontena i kam long PNG olsem long sapot bilong em long ol komyuniti long PNG i kisim gutpela helt ke.

Andrew Barry, Menesing Dairekta bilong EMPNG i tok EMPNG em i gat strongpela tingting long investim mani long ol helt projek we bai stap longpela taim long helpim long hevi bilong helt long PNG.

"Ol kain patnasip olsem wantaim PNG Traibel Faundesen, Projek C.U.R.E na ol haus sik bai bringim gutpela developmen na



Gary T Bustin, Presiden bilong PNG Tribal Faundesen (hankais) sanap wantaim CEO bilong Angau Memoriel Haus sik na ol dokta.

mipela i bilip olsem dispela wok Poroman bai go het yet long bringim senis long ol pipel," Mista Barry i tok.

Namba wan kain medikal kontena olsem i bin go long Tari Haus sik long 2015 na narapela bai i go long Daru Haus sik long dispela mun.

Mani bilong baim ol dispela 4-pela medikal kontena i bin kamap long wanpela fanresing we i bin kamap long Denver, Colorado long

2014. Ol i kolim Fes Ledi belo kaikai we Misis Lynda Babao O'Neill i bin toktok long 1,200 bisnis na komyuniti lida.

Wantaim wok bilong painim mani, dispela i bin namba wan taim long wanpela meri bilong PNG Praim Minista i toktok long wanpela bikpela intenesenel bung kaikai olsem.

GT Bustin, PNG Traibel Faundesen Presiden i tok, "Antap long wok bilong helpim ol pipel, em i

bin wanpela bikpela step we ol meri long PNG i kisim na bai givim gutpela tingting long ol yangpela pikinini meri long PNG husat i gat ol driman bilong ol yet."

"EMPNG i helpim mipela wantaim bikpela mani long bringim ol saplai i kam na tu long kain bikpela tiaim bilong kantri olsem em i bin apim nem bilong ol meri long PNG taim meri bilong Praim Minista i bin go toktok. Misis O'Neill i giivim wanpela pawa toktok stret long naispela pipel bilong PNG na ol

Namba wan gret 8 sumatin greduet long Enequai

ST. EDWARD Enequai Praimeri Skul long Kurumbukari insait long Bundi LLG, Madang Provins i bin lukim 13-pela Gret 8 sumatin i bin greduet long Trinde Novemba 13.

Moa long 700 manmeri i bin bung long Enequai Rilokesen skul graun long witnesim dispela nambawan greduesen i bin kamap aninit long luksave bilong Ramu NiCo Projek MOA.

Dispelai skul i stap aninit long komitmen bilong Ramu NiCo Projek MOA we i tok olsem Ramu NiCo i mas kamapim rilokesen ples bilong ol papagraun na tu wokim dispela skul. Na taim ol i kamapim dispela skul em lukim fes greduesin i bin kamap dispela yia.

Ol lain wokman bilong Ramu NiCo Komyuniti Afes long Madang na KBK Main, asples bisnisman, Edward Kiza, KBK Ltd Menesing Darekta, John Opotio na ol lokol lida i bin stap long amamasim greduesen.

Ol lain husat i bin toktok long greduesen i tok strong olsem PNG i nidim stret ol planti save manmeri na St Edward Praimeri skul em wanpela bilong ol skul we i ken



15-pela Elementri sumatin na 13-pela Gret 8 sumatin wantaim ol ges, tisa, papa mama na ol famili memba i sanap long kisim piksa wantaim bihain long greduesen.

kamapim ol kain save man na meri.

Ol ges spika i tok tu olsem ol sumatin i mas lukautim ol yet gut long ol kainkain pasin we bai bagarapim skul bilong ol, na tok ol papa na mama i mas lukautim ol pikinini bilong ol gut long haus

taim ol lusim skul. Ol i tok tu olsem gavman i mas givim olgeta sapot long ol kain skul olsem St Edward Praimeri i ken kamapim planti save man na meri bilong kantri.

Ol dispela 13-pela fes Gred 8 sumatin bai nau go long Gret 9 sapos ol i bin wokim eksam bilong

ol gut. Narapela 15-pela elementtri sumatin tu i greduet long gret 2 na bai go antap long Praimeri skul level.

Ramu NiCo-MCC i bin wokim dispela skul na givim i go long lukautim bilong gavaman ananit long luksave bilong Ramu NiCo Projek MOA.

Mista Edward Kiza wanpela bilong ol lain husat i kamap long greduesen i tok strong olsem skul save em Usino-Bundi distrik i nidim stret edukesen olsem na em donetim wanpela K3,000 i go long skul long ol i mas wokim skul laibreri.

lalibu/Pangia distrik i mekim gutpela wok

DIPATMEN bilong Imple-mentesen na Rurel Developmen (DIRD) i amamas long lalibu-Pangia Distrik long ol i yusim gut mani bilong Distrik Sevis Impruvmen Program (DSIP) long kamapim gutpela laip long ol pipel long ples.

Insait long 4-pela yia bilong dispela gavman, moa long K30 milien DSIP mani i bin go long mekim wok projek long distrik.

Ol opisa bilong DIRD i bin go long sekim ol wok bilong Sevis Impruvmen Program (SIP) long las mun. Ol opisa bilong dipatmen i lukim olsem distrik bilong lalibu-Pangia i gat inap

save na samting long mekim wok i go het.

Ol opisa i bin kamap long distrik hetkwata na harim tok-tok bilong Deputi Distrik Edministreta na Distrik Projek Kodineta, Michael Ariando olsem edministresen bilong distrik i kamapim pinis ol wok long edukesen, helt, woks, polis, komes, forestri, komyniti developmen na egrikalsa sekta na i gat samting olsem 300 pablik sevan i wok i stap long distrik.

DIRD Senia Projek Opisa, Prenella Anuk i bekim toktok bilong Mista Ariando olsem

distrik bilong ol i wokim pinis planti wok bilong ol gavman sekta we ol i nidim long mekim distrik i go het.

Em i tok olsem gavman i laik lukim olsem olgeta sekta i mas wok wantaim long bringim ol sevis i go long ol distrik.

“Olgeta gavman fasiliti we yupela i nidim long mekim wok gut olsem ol wokman na wokmeri na ol narapela gavman sekta i stap pinis long hia,” Mis Anuk i tok.

“Mipela i laik lukim olgeta sekta i mas bihainim tingting bilong gavman, wok bung wantaim long kirapim distrik

aninit long lukaut bilong Distrik Edministreta olsem Sif Eksektiv Opisa bilong DDA,” em i tok.

Ol DIRD opisa i amamas long lukim ol developmen we i wok long kamap nau long distrik we distrik edministresen i statim olsem ol rot wok, bris, skul infrastraksa na wanpela wara projek long olgeta LLG nau i wok long kamap.

Ol opisa i lukim tu wok bilong kirapim Westen Pasifik Yunivesiti i wok long go het wantaim sapot bilong Sauten Hailans Provinsal gavman.

Mista Ariando i tok klia

olsem SHP gavman i mekim disisen pinis long mekim ol wok rere olsem long apgretim Paunda haidro plent na apim 3 kilowatt i go long 12 kilowatt na long kisim moa polisman na meri long helpim wantaim lo na oda na long mekim komyniti i kamapim gutpela ples bilong ol wokman na wokmeri bilong narapela kantri long kam na stap, wok na stadi long nupela Westen Pasifik Yunivesiti.

Em i tok olsem i gat planti gutpela samting bai kamaut long bihain taim yunivesiti i kirap.



Akiteksa, Developmen na Stail?

I GAT tingting i stap olsem i gat wanpela rot tasol bilong kamapim developmen. Dispela tingting i mekim na planti long yumi i tingting olsem olgeta developmen bilong gutpela sindaun i mas kam long ausait.

Kain ol tingting i rabisim ol gutpela save ol tumbuna i bin kamapim. Sampela taim i go pinis yumi bin stori long yam i gat wanem skul long yumi. Nau yumi laik stori long haus.

Insait long Papua Niugini planti lain saveman bilong mekim haus i save aigris tru long ol stail haus bilong yumi long ol ples. Yupela ting dispela ol save i kam long wanem hap? Em ol save we i kamap long graun bilong yumi yet long Papua Niugini.

Sampela piksa bilong dispela ol haus i stap long Mosbi. Tasol yumi mas lukim moa dispela kain ol haus long Mosbi na ol arapela hap long kantri.

Wok developmen bilong yumi tude i laikim samting em i hariap na i no nidim planti mani long mekim. Dispela i min yumi mas rausim stail.

Dispela kain tingting bai abrus tru long putim sampela samting we i soim dispela em i ples bilong yumi. Yumi laik bihainim stail bilong ol arapela ples na yumi orait tasol long ol bokis haus antap, antap long wanpela na narapela. Yumi bai bilasim ol siti na taun bilong yumi wantaim akitekta bilong ol arapela ples.

Bilong wanem na yumi stori long stail. Papua Niugini yumi pipel bilong stail, yumi lukim ol gaden bilong yumi, ol bilum bilong yumi, ol tokples bilong yumi, ol tumbuna singsing danis bilong yumi na planti moa. Ol haus em i namba wanpela piksa we sapos ol arapela i lukim ol i save stret em ol pipel bilong dispela ples na ol i rispekim save we i kam long graun bilong ol.

Ol lain tumbuna i save go senis wantaim ol arapela pipel long kisim save o risos we ol i sot long en na kam bungim wantaim save bilong ol long mekim kamap sampela bikpela samting na singsing danis, wokim stail haus em i sampela bilong ol. Tude yumi kisim olgeta samting long ausait.

Developmen em i mas stat wantaim driman bilong yumi yet. Dispela driman em i mas gat luksave long wanem kain ol risos na save yumi gat long ples bilong yumi pastaim.

Dispela ol haus we ol tumbuna i bin mekim i no save kamap hariap tasol. Nogat. Ol i save traim, traim olgeta samting long bus bilong ol pastaim, na ol i skelim tu dispela ol haus i gat wanem kain wok na bihain ol i mekim.

Yumi mas sanap strong na no ken tingting long mekim hariap wok o long kisim developmen long ausait. Yumi mas soim olsem yumi pipel i ken kamapim developmen bilong yumi yet. Taim yumi lukim ol stail haus long siti na long ol ples, yumi ken amamas olsem developmen bilong yumi em i gat laip. Em i samting we i stat planti tausen yia i go pinis, na yumi laik givim long ol pikinini bilong yumi sampela samting we ol i ken lukim na tok, ‘yes dispela em i Papua Niugini, dispela em i ples bilong mi’.



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg

Putim manmeri go pas, i no mani

WANPELA man long Enga Provins i lusim wok tisa na i statim bisnis long Pot Mosbi.

Bisnis bilong Jessy Karato i no bikipela bisnis na em i no kain ol bisnis bilong mekim moa mani.

Mista Karato i statim liklik bisnis bilong mekim ol printing, potokopi, skening, lamine-sen, baiding na intanet kefei sevis long sevim ol manmeri long setelmen.

Mountain Printing & Professional Services i

putim ol manmeri i go pas na em i laik sevim intres bilong ol manmeri i stap long setelmen long Morata.

Pastaim em i bin i statim liklik printing sevis bisnis bilong em long Waigani, klostu long Waigani TST.

Tasol em i lusim Waigani na nau em i operet long Morata 2 maunten bas stop.

Waigani em i bisnis senta na em i stap long wanpela gutpela loke-sen we planti manmeri i

save raun.

Tasol Mista Karato i no pret long raskol pasin, sampela ol distebens, ol birua na hevi i save kamap long ol setelmen.

As tingting bilong em i statim liklik bisnis long setelmen, em long givim sans long ol manmeri long kisim sevis long haus dua stret.

Dispela i tru bikos liklik ples bilong em o stua bilong em i save op long 8-kilok moning i go inap 9-kilok nait.

“Mi laik bringim sevis i kam klostu long haus dua bilong ol manmeri, ol grasruts manmeri long Morata,” Mista Karato i tok.

Long Tunde long las wik Mista Karato i bin kisim luksave long dispela sevis em i bin givim long ol manmeri long Morata.

Gavana bilong NCD, Powes Parkop, i bin mekim opisal opening bilong stua bilong em i stap long Morata 2 Maunten bas stop.

Gutpela sevis long haus dua

Gavana Parkop i bin amamas long luksave long dispela gutpela sevis Mista Karato i givim long komyuniti.

Taim em i mekim opisal opening bilong nupela taiping, printing na potokopi stua, Mista Parkop i tok em i amamas olsem ol pipel bilong em long Morata i ken kisim printing na potokopi sevis long haus dua stret.

“Mi amamas long luksave olsem pasin bilong ol manmeri bilong yumi long Morata bai senis.

“Morata i ken kamap wanpela ples insait long Pot Mosbi siti we yumi ken statim ol liklik bisnis na kamapim bisnis i go bikipela,” Mista



Jessy Karato

Parkop i tok.

Em i salensim ol manmeri long lukautim dispela sevis long haus dua.

“Bai yupela no moa westim taim na westim mani long go raun long Boroko long mekim potokopi na printing.

“Olgeta samting i stap long hia. Mista Karato i bringim olgeta sevis i kam klostu long pipel.

“Mi amamas long lukim olsem yumi gat intanet kefei tu i stap.

“Rispekim dispela sevis, tok tenkyu long Mista Karato, na yusim gut ol samting,” Mista Parkop i tok.

Moa long 100 manmeri i bin stap long lukim dispela opisal opening.

Ol local komyuniti bilong Morata 2 i bin wanbel long lukim olsem Mista Karato i

bringim dispela sevis i kam klostu long helpim ol pipel.

Ol Enga na Morobe komyuniti i bin amamas long dispela na i bin bilas long mekim opisal opening.

“Mi laik tok tenkyu long ol manmeri long Morata, husat bai kamap kastoma bilong mi,” Mista

Karato i tok.

Stua bilong ol i stap long maus rot. Dispela em long Morata 2 maunten bas stop.

Mista Karato i tok ol bai givim sevis gut wantaim gutpela tingting na bel isi bikos as tingting bilong em i no long mekim mani, em laik sevim ol pipel.

“Plantil ol bisnis manmeri bai no inap intres long kam mekim bisnis long kain ples olsem Morata. Mipela i operet long hia bikos mipela i laik givim sevis long ol manmeri.

“Ol manmeri i ken sevim mani na sevim taim, ol manmeri long Morata i no inap long go long Boroko o Waigani long kisim printing na potokopi sevis,” Mista Karato i tok.



Jessy Karato...mi amamas long Gavana Parkop i givim luksave long liklik bisnis mi mekim long sevim ol manmeri long Morata.

Lusim wok tisa na statim bisnis

Taim Mista Karato i lusim tising sevis long yia 2008, em i kam skul gen long International Training Institute (ITI) long Pot Mosbi

Lusim wok em i wanpela bikipela samting we planti manmeri i save painim hat long mekim.

Mista Karato i gat meri, pikinini na famili long lukautim tasol em i strongim sait, na mekim bisnis long sait.

Em i hat long lusim wok na statim liklik bisnis long kain ples olsem Pot Mosbi bikos olgeta samting em i mani tasol.

Sapos yu no wok mani, laip bai kamap hat, Mista Karato i tok.

“Mi lusim wok tisa na mi bin statim dispela liklik bisnis long Pot Mosbi long yia 2008,” Mista Karato i tok.

Mista Karato i tok long dispela taim (long yia 2008) planti ol

mameri i bin mekim wankain bisnis long Pot Mosbi na Waigani eria.

Dispela i mekim pasin bilong kamapim kompetisen i strong tumas.

Prais bilong rentim opis spes long Pot Mosbi tu i go antap na dispela i mekim laip long mekim bisnis long Pot Mosbi i kamap hat tru.

“Dispela i no stopim mi long mekim mao yet. Mi lusim Waigani long sevim moa mani na mi kam opim nupela stua long Morata 2,” Mista Karato i tok.



Ol Silimuli singsing grup bilong Enga Provins (Wild West) i bilas na redi long tok welkam long NCD Gavana Powes Parkop, husat i bin mekim opisal opening bilong Mountain Printing & Professional Services long Morata 2 Maunten bas stop.

Ol poto: Nicky Bernard

Em i tok em i bin wok hat tru long larim liklik bisnis bilong em i gro i go bikipela, maski sampela taim laip i hat.

Mista Karato i tok tenkyu long NCD Gavana i givim bikipela luk-

save long liklik bisnis em i mekim long Morata long sevim manmeri.

“Mi amamas long Gavana nau i luksave long liklik bisnis mi mekim long hia na i mekim opisal opening.

“Dispela i strongim mi long mekim samting i kamap gut, na mekim i go bikipela,” Mista Karato i tok.

Mista Karato i skul long International Training Institute (ITI).



Pater Mike Peters long taim bilong misa lotu long Jack Pidik Park.

Susa daiosis i bringim tok amamas i kam

Veronica Hatutasi i raitim

TAUNSVILLE Katolik Daiosis long Australia em i susa daiosis bilong Pot Mosbi Asdaiosis.

Long tok tenkyu selebren long makim 50 krismas bilong Pot Mosbi Asdaiosis na tu, long welkamim nupela Kardinel, Sir John Kardinel Ribat, i bin kamap long

Pot Mosbi long Novemba 27, 7-pela delegenen i bin makim Taunsvil Daiosis na kam stap long selebren.

Pater Mike Peters i bin go pas long delegenen i bin tok olsem susa daiosis bilong Pot Mosbi Asdaiosis, ol i amamas long kam na serim amamas wantaim ol brata na susa long Pot Mosbi Asdaiosis. "Mipela i karim tok

amamas bilong Taunsvil Daiosis i kam long nupela Kardinel husat i olsem lait long mipela.

"Long Taunsvile daiosis, mipela i wok long pre long susa Pot Mosbi Asdaiosis. Mipela i serim amamas wantaim yupela long nupela Kardinel, Sir John Kardinel Ribat," Pater Mike i bin tok.

Bisop bilong ol i bin dai tripela krismas i go pinis,

na Pater Mike e mi wok olsem Edting Daiosis en Edministreta inap ol makim nupela bisop.

"Mi kam wantaim ol prea na amamas bilong ol kongrigesen biolong susa daiosis na mak bi-long amamas long yumi pas olsem ol susa na olsem, Kardinel Ribat em i bilong mipela tu," Pater Mike i bin tok.

Ol sios i mas netwok na wokbung

Veronica Hatutasi i raitim

SALENS i go aut long ol Kristen long netwok na wok bung wantaim long kamapim gutpela sindaun nab el isi, yuniti na kisim Tok bilong God i go aut.

Bisop bilong Pot Mosbi Anglikan Daiosis, Bisop Denny Guka i bin wokim dispela tok-tok long bikpela lotu Katolik Sios long Mosbi i bin mekim long amamasim 50 krismas na tu, long welkamim nupela

Kardinel.

Kardnel Ribat na Bisop Denny i save wok bung gut tru wantaim long sampela yia taim ol i go pas long PNG Kaunsel bilong Sios (PNGCC), na ol i gat gutpela wok pren namel long ol.

Ol i gat save na wari long planmti samting i karamapim sios na kantri, olsem ol asailam sika long Manus na ol arapela sosel isu long kantri.

Bisop Denny i tok em i makim ol 7-pela sios i memba

bilong PNGCC olsem Anglikan, Yunaitet, Evanjelikel Luternan Sios bilong PNG, Katolik, Baptis Yunien na Salvesen Ami long tok amamas long nupela Kardinel husat em i tok em i mak bi-long ekumenisim we tupela i sanap wantaim na mekim wok.

Ekumenisim i min olsem ol sios i bung na wok wantaim long gutpela na wanbel pasin.

Em i tok God i luksave long wok bilong sios long PNG na

nupela Kardinel i no bilong ol Katolik tasol, nogat. Em i bilong olgeta sios long PNG.

Em i bin askim olgeta pipel long sanap na harim God i tokim ol wanem samting.

Em i bin tok yumi mas askim yumi yet na mekim samting long watpo taim kantri bilong yum i pulap long ol neturel risos, tasol planti lain i nogat inap kaikai, wara na ol klos.

UN Anda Seketeri Jeneral lukluk raun long Pot Mosbi

Frieda Sila Kana i raitim

YUNAITET Nesens (UN) Anda Seketeri Jeneral na Dairekta bilong UN Wimen, Dokta Phumzile Mlambo-Ngcuka i bin stap long Pot Mosbi long helpim kempen bilong UNITE stat long las wik i kam inap dispela wik.

Wokabaut bilong Dokta Mlambo-Ngcuka i makim 16 De bilong Ektivisim bilong daunim pasin bilong Jenda Bes Vailens o pasin bilong man paitim na bagarapim meri. Papua Niugini i wanpela kantri we UN i bin makim long dispela Eksektiv Dairekta bilong UN Wimen long kam namel long 1 Desemba i go 4 Desemba.

Long Fonde 1 Desemba, Dokta Mlambo-Ngcuka i bin stap long wanpela UN Wimen Midia Awod nait long Grand Papua Hotel long Pot Mosbi we em i bin tok amamas long ol midia lain husat i bin kisim awot long gutpela wok bilong ol long strongim awenes na ripot long ol pasin bilong Vailens na HIV na AIDS.

Long Fraide 2 Desemba em i bin holim wanpela midia konprens long Taurama Aquatic Senta long strongim yet toktok bilong daunim vailens long ol meri na ol liklik pikinini meri na tu long strongim ol meri long sanap long ol yet.

Dokta Mlambo-Ngcuka i tokim ol lain midia olsem wok bilong midia em impoten long bringim dispela toktok bilong Jenda Bes Vailens i go long olgeta hap. Em i tok tenkyu long gutpela wok bilong ol lain nius ripota husat i bin kisim ol awot tasol em i tok olsem i gat bikpela wok i stap yet long dispela kantri, we pasin bilong lukdaun long ol meri olsem samting nating, emi bikpela tru.

Em i tok ol nius ripota i mas mekim gutpela wok painimaut long ol hait pasin bilong ol man na meri husat i save bagarapim na daunim ol meri na raitim ol ripot i go long pablik bai save.

"Mipela long UN Wimen i stap hia long helpim yupela olsem na yupela i mas tokim mipela long wanem we mipela i ken helpim yupela," Dokta Mlambo-Ngcuka i tok.

Em i tok long nius konprens olsem wanpela astingting long em i go lukim ol gavman bilong PNG em long luksave long wanem we ol inap long painim na putim mani bilong daunim Vailens Egens Wimen.

"Em i taim nau long ol het ov institusen, munisipaliti na ol narapela lida long toktok long wankain samting tasol. Putim mani i go long hap we em bai helpim toksave bilong GBV na VAW long i go long pablik.

"Mipela long UN i lukim wanpela samting long olgeta hap bilong wol olsem Jenda Bes Vailens na Vailens Egens Wimen em i stap long olgeta kantri. Na long wol em ol risos bilong ol kantri em ol man i bosim. Ol man i no gat ekspirians bilong pen we ol meri i save karim," em i tok.

Anglikan pater pre long Palamen

Frieda Sila Kana i raitim

ANGLIKAN sios pater bilong Kebara Peris long Kokoda Dineri, Pater Henry Newton Kiae em i gat bikpela amamas long stap wantaim pre lain bilong Bodi bilong Krai bilong Kokoda na Agape Intedinominesenl Ministri (A.I.M) Pre Kodineta bilong Palamen na gat sans long pre long Nesanel Palamen inap long 7-pela de.

Pater Henry Newton wantaim 7-pela memba bilong Kebara Peris wantaim Siaman bilong ol Martin Anisi i bin harim singaut bilong God i kam long maus bilong Pasto Caleb bilong Kokoda AIM, man i go pas long Bodi bilong Krai long Kokoda, long makim Oro provins olsem namba wan provins long go pre long Nesanel Palamen. Ol i bin go wantaim grup we i go bek pinis long Popondetta long Mande dispela wik tasol.

Pater Henry em i brukim banis we i save pasim ol wan wan lotu lain long stap ol yet na i no bung wantaim ol narapela lain husat i lotu long wankain God tasol.



"Dispela muv bilong Bodi bilong Krai, em laik bringim ol sol bilong ol man i kam bung wantaim.

Bikpela problem long PNG em ol sios i save brukim ol sol bilong God.

Olsem na long Kokoda Dineri mipela i kam long Bodi bilong Krai muvmen long daiosis bilong Popondetta long soim olsem i no gat banis long brukim lain bilong God," Pater Henry i tok.

"Daiosis en Bisop i save long kam bilong mipela na Bisop bilong Pot Mosbi tu i save long kam bilong mipela. Sios na gavman bai wok bung wantaim olsem na mipela

long Kokoda Dineri i kisim singaut long kam long holim ol pre miting insait long haus bilong mekim disisen bilong PNG," Pater Henry i tok.

Pater Henry i tok, Nesanel Palamen em i bagarap pinis long sin pasin olsem na mipela B.O.C nau i pre long long Nesanel Palamen na Gavman, ol memba bilong palamen, Praim Ministri, na nesen bilong PNG, Sios Ministri, Sif Jastis, NEC bilong mekim lo, na long dispela ileksen long 2017 bai kamapim gutpela gavman.

"Mipela i pre long 8.9 milien pipel bilong PNG na ol

Katim Fewel kek. L-R: Senia Pasto bilong Agape Intedinominesen Sios na Kodineta bilong BOC Palamen Pre Grup, Pasto Daniel Hewali, Pater bilong Anglikan Sios long Kebara Peris, Kokoda, Henry Newton Kiae na Pasto Caleb Sakiki, Siaman bilong BOC long Kokoda i redi long katim fewel kek i kam long ol famili bilong A.I.M long Taurama Rot. **Poto: Frieda Sila Kana.**


sios ministri olsem na mipela i kam. God i givim mipela 14 de long hia na mipela bai go bek tumora (Mande 5 Nov)," Pater Henry i tok.

Taim ol i go bek, Pater Henry i tok, em i laik bilong lidasip bilong sios na Bisop bilong Kokoda na Pot Mosbi sapos ol i laikim bai mipela i kam bek gen long Pot Mosbi long pre insait long Nesanel Palamen.

"Mipela laik strongim ol Kristen bilong mipela long pre long kantri bilong yumi na bai yumi gat gutpela gavman long 2017 ileksen," Pater Henry i tok.

Gutpela taim bilong skelim yumi yet

Ho!Ho!Ho! PNG kam gut yah!!!



pela wei bilong pinisim dispela yia 2016. Long begin bilong yia i kam inap long namel bilong en, sampela hevi i bin kamap na i bringim nem nogut na hevi long kantri.

Tasol i gat ol gutpela samting i bin kamap tu, na dispela

bikpela wol soka resis em i wanpela bilong ol.

Gutwan ol yangpela meri PNG! Yupela i apim nem bilong PNG long wol soka.

Yumi stap nau long mun Desemba na ol pipel i wok long redi long Krismas.

Ol stua long ol siti i stat long putim ol Krismas bilas na salim ol kain kain samting bilong grisim ol manmeri na pikinini.

Ol opis na bisnis tu i stat long mekim ol program bilong Krismas na ol sios tu i kirapim tingting bilong ol pipel long soim

pasin bilong marimari na givim presen long ol tarangu, ol kalabus na ol sikman.

I gat kain kain gutpela program bai kamap long amamasim dispela bikpela de bilong yumi ol Kristen.

Em i taim bilong lukim pes bilong Bikpela long laip bilong ol bratasusa na ol manmeri nabaut.

Em i taim bilong lusim ting long belhat na mipasin na pasin bilong paitim bros. Em i taim bilong skelim yumi yet na wanem kain pasin yumi save soim ol arapela.

Yumi soim tru pasin bilong bel isi na laikim ol arapela long ol wok yumi mekim, o yumi tok-tok tasol long maus na i no bihainim tru long pasin bilong yumi.

Ating sapos yumi skelim yumi yet bai yumi luksave olsem yumi sot na i paul nabaut long rot.

Tasol sapos yumi putim spirit bilong Krismas long hart bilong yumi bai yumi inap painim rot bilong stiaim gut laip bilong yumi.

Yumi lukluk long dispela star bilong Betlehem na bihainim em, ating bai yumi no inap paul na bam nabaut.

Bai em i bringim yumi i go long rait ples stret. Yumi yet i ken skelim.

Gavman pasim gutpela sindaun bilong manmeri

OL wok kamap bilong gavman stat long 1993 i soim Gavman i wok long kamapim pasin bilong pasim mani bilong strongim sindaun bilong ol manmeri.

Dispela i lukim ol manmeri i kisim nating taim nogut.

Em i save pasim mani na wetim taim bilong ileksen nau bai em i yusim mani long kamapim ol projek olsem rot, haus sik, skul, maket, bris na ol arapela projek.

Em i no tingting planti sapos ol manmeri i kisim taim long wanem tingting bilong em long wet inap klostu ileksen taim bai em yusim mani long kamapim ol projek.

Kain wok olsem long ai bilong planti manmeri i gris wok tasol, em i no soim trupela bel na laik bilong gavman long helpim ol manmeri.

Wanpela kain projek em nau leit K113 milien tiusen fi fri (TFF) mani gavman i



givim i go aut long ol skul.

Dispela i laspela bilong K602 milien Gavman i makim long givim long ol sku olsem TFF insait long 2016 Baset.

Ol skul i bin laikim tru dispela mani long Tem Foa tasol no gat na ol skul i pas pinis na mani i go bihain tru. Narapela projek em K32 milien rot projek gavman i bin lonsim long las wik long silim rot long Wabag i go long Kompam Ambum long Enga provins.

Ol manmeri i bin laikim kain rot moa long 10-pela yia tasol maski olgeta yia gavman i givim bikpela

mani, K10 milien, long wan wan distrik aninit long distrik sevises impruvmen program (DSIP), nau memba i no mekim wanpela gutpela wok long dispela ol mani.

Nau klostu ileksen i laik kamap, ai bilong memba i op long wok em i mas mekim.

I gat save olsem em i stat bilong moa ol kain toksave na lons long kamap long ol mun i kam.

Long taim gavman i pasim mani na i no yusim long taim stret we wok i mas kamap, dispela i lukim em i yusim mani long ol arapela samting. Planti bilong dispela ol arapela wok em bilong helpim gavman na ol memba yet. I no long ol liklik manmeri.

Em i yusim mani em i holim long kamapim ol giaman rot na bris.

Kain ol rot we em i stretim na silim long Gordon Industrial Senta long Pot Mosbi.

Prais tru o mani mak bi-

long kamapim projek bai stap long K1 milien o K2 milien tasol gavman bai giaman long surukim kos i go antap long K5 milien o K7 milien.

Em olsem kontrekta o kampani i kisim trupela pe na gavman opisa i kisim hap bilong dispela kos.

Taim kain pasin i kamap, wok bilong stretim ol arapela pablik infrastraksa na kamapim nupela infrastraksa i no inap kamap.

Planti bilong dispela ol mani i go long poket bilong dispela ol memba na ol gavman opisa.

Long dispela as Papua Niugini i no develop gut na kamapim gutpela sindaun bilong ol manmeri.

Nau em i gutpela taim long ol manmeri i kisim taim na glasim gut memba bilong ol.

Sapos em gris man tasol, manmeri i no ken votim em long makim ol pipel long Palamen.

WANTOK

Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantokniuspapa.com

Pe bilong wanpela yia
52 niuspapa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Ol apdet bilong Ilekse

Ilektoral Komisina i gat pawa

Aja Potabe i raitim

ILEKTORAL Komsina Patalias Gamato tasol i gat pawa long stopim o larim ol man husat i gat kriminal rekot long sanap long Nesenel Ilekse long 2017.

Rejistra bilong Politikel Patis na Kandidate, Dokta Alphonse Gelu, i tok PNG i no gat wanpela lo i stopim ol kandidate husat save brukim lo bilong kantri, i gat nem no gut long komyuniti, na i gat kriminel rekot long sosaiti.

“Nau yet i no gat wanpela lo i stap long stopim ol dispela kain man husat i laik sanap long 2017 Nesenel Ilekse.

“Ilektoral Komisina tasol bai gat pawa long mekim toktok long dispela kain samting.

Mipela i no gat pawa bilong lo i no givim tok orait long,” Dokta Gelu i tok.

Em i tok planti manmeri na ol kandidate husat i laik sanap long ilekse long neks yia i wok long salim komplein i kam long opis bilong em, tasol opis bilong em i no gat pawa long mekim dispela wok bilong stopim ol man husat i gat nem no gut.

“Pawa i stap wantaim Ilektoral Komisina. Tasol long sait bilong lo, i no gat wanpela lo i stap long stopim ol kriminel



ILEKTORAL Komsina Patalias Gamato.

i sanap long Ilekse,” Dokta Gelu i tok.

Sapos wanpela lo bilong stopim ol kriminel i stap, dispela lo bai stopim ol memba husat i bin brukim lo na slip long kalabus long ol i no ken sanap long ilekse.

PNGEC lukluk long sevim mani

PNG Ilektoral Komisina (PNGEC) i laik sevim sampela mani bihain long 2017 Nesenel Ilekse, Sif Ilektoral Komisina Patalias Gamato i tok.

Mista Gamato i tok PNGEC bai bihainim dispela pasin we ol i bin mekim long taim bilong holim bai ilekse long Saut Bogenvil na long Samarai-Murua.

Long ranim 2017 Nesenel Ilekse, Gavman i katim na givim K400 milien long PNGEC aninit long 2017 Nesenel Baset.

Dispela mani mak i lukim 40 pesen inkris o i go antap long mani mak PNGEC i bin kisim long ranim 2012 nesenel ilekse.

Mista Gamato i tok K121 milien bilong dispela K400 milien bai go long polis sekyuriti operesen na K297 milien bai go long ranim ilekse operesen.

“Mipela i bin bihainim strongpela polisi bilong yusim mani gut na mekim samting stret. Bihain long dispela tupela ilekse, PNGEC i bin sevim sampela mani, na i no yusim moa mani,” Mista Gamato i tok.

Em i salensim ol wok manmeri bilong PNGEC long bihainim dispela pasin bilong bihainim baset stret na sevim mani.

Mista Gamato i tok PNGEC i bin sevim K1.8 milien long Saut Bogenvil bai-ilekse na K800,000 long Samarai-Murua bai

ilekse.

“Yumi (PNGEC) mas kilim dai dispela pasin bilong ol Ilekse Menesa i kisim ol sevis provaida long laik bilong ol yet na pinisim mani nating long sampela ol wok we PNGEC i no nidim long en.

“Olgeta provins bai gat wan wan baset bilong ol long hamas mani ol i laik yusim long taim bilong ilekse, tasol olgeta mani bilong yusim bai stap long han bilong PNGEC hetkwata long Pot Mosbi,” Mista Gamato i tok.

Tasol ol wan wan provinsal ilekse menesa bai kisim sampela mani long baim ol buk na stesineri, fiul bilong kar, na mani bilong ranim opere-

Soim stretpela pasin long ilekse taim

Aja Potabe i raitim

SIF Ilektoral Komisina Patalias Gamato i laikim olgeta wok manmeri na opisal bilong PNG Ilektoral Komisina (PNGEC) long soim stretpela pasin na mekim wok stret long taim bilong Nesenel Ilekse long neks yia.

Mista Gamato i les long harim o lukim wanpela opisal o wok manmeri bilong PNGEC i kisim braiberi mani, mekim paul pilai na pasin korapsen, na i les long lukim ol opisal i kamapim hevi na birua long taim bilong Ilekse long 2017.

“Mi les long lukim ol wok manmeri bilong Ilektoral Komisina i bikhet na mekim nabaut long taim bilong ilekse. Menesmen bilong mi em i narapela kain na mi bai no inap isi long ol opisal husat i mekim paul pilai,” em i tok.

Mista Gamato i givim dispela strongpela tok lukaut long olgeta Provinsal Ilekse Menesa na Asisten Ilekse Menesa, na i laik skruim dispela toktok i go moa long ol wok manmeri bilong Ilektoral Komisina i stap long olgeta provins na distrik.

Bihain long pinis bilong 2017 Nesenel Ilekse, Mista Gamato i laik lukim;



Ol woklain bilong PNG Ilektoral Komisina

- ilekse i bihainim plen na baset mani na ol i kisim bek ol rit pepa insait long taim yet;
- ol Ilekse Menesa i menesim gut na bihain mani plen long yusim K297 milien baset;
- daunim mani mak bilong ilekse operesen long 40 pesen mak (K117 milien);
- mani mak bilong ol bil bilong ol sevis provaida i mas liklik long olgeta provins;
- namba bilong ilekse petisen i no ken go antap;
- ol meri mas vot na i mas go long ol wan wan poling ples long vot; na
- ol manmeri husat i gat disabiliti i mas vot.

Gamato givim strongpela tok lukaut

Aja Potabe i raitim

SIF Ilektoral Komisina Patalias Gamato i givim wanpela strongpela tok lukaut long ol wok manmeri bilong PNG lektoral Komisina (PNGEC).

Mista Gamato i tokim ol wok manmeri na opisal bilong PNGEC long stopim pasin bilong kisim braiberi, mekim pasin korapsen, mekim paul pilai na i no ken mekim pasin no gut we bai bagarapim nem bilong PNGEC.

“Mi bai no inap isi long ol opisal husat i mekim pasin no gut. Mi laikim ol opisal na wok manmeri bilong PNGEC long bihainim dispel toktok na mekim wok stret bikos mi bai no inap isi long ol,” Mista Gamato i tok.

Mista Gamato i tok aninit long lukluk bilong em, em i laikim ol wok manmeri na opisal long senisim pasin no gut bilong ol na stopim pasin bilong mekim paul pasin.

“Bisnis bilong ranim ilekse aninit long lukluk bilong mi bai kamap narapela kain. Ol opisal bilong PNGEC i no ken apim mani mak bilong ol samting.

“Mipela i laik daunim mani mak bilong ol sevis PNGEC bai kisim, na dispel bai helpim mipela long sevim sampela mani.

“Mi laik toksave gen long yupela ol Provinsal Ilekse Menesa na ol Asisten Ilekse Menesa long tingting gut na traim long yusim mani gut, we mipela i ken sevim sampela mani.

“Pasin bilong westim mani nating long ol liklik sevis na sampela ol samting we i no nid long ilekse taim, i no ken kamap long dispela ilekse,” Mista Gamato i tok.

Mista Gamato i tok bipo nem bilong PNGEC i save bagarap taim ol manmeri i toktok long ilekse frod o paul pilai, vailens o pasin bilong pait na kirapim hevi na birua, na intimidesen o pasin bilong toktok strong na pretim ol manmeri.



Ol apdet bilong Ilekseen

NCD kamap las provins long apdetim ilektoral rol

Aja Potabe i raitim

TRIPLELA Ilektoet insait long Nesenel Kapitel Distrik (NCD) i kamap las ilektoet long PNG long mekim wok bilong kamapim nupela vota enrolmen na apdetim ilektoral rol.

Deleget bilong Ilektoet Komisina, na Deputi Komisina bilong Koporet Sevis, John Kalamoroh, i opim program bilong mekim wok apdet bilong ilektoral rol insait long Mobi Saut, Mosbi Not Is na Mosbi Not Wes.

Mista Kalamoroh i makim maus bilong Sif Ilektoet Komisina, Patalias Gamato, na i opim dispela wok long las wik Trinde.

Wok apdet i stat long las wik Trinde na bai pinis bihain long 40 de, Mista Kalamoroh i tok.

Moa long 800 manmeri i kamap enrolmen ejen bilong PNG Ilektoet Komisina (PNGEC) na ol dispela lain bai go raun long wan wan ples insait long tripela ilektoet long Pot Mosbi siti long kisim ol nem bilong ol manmeri husat inap long vot long nesenel ilekseen.

“Yupela i makim mipela (PNGEC) na bai yupela i wok aninit long wan wan ritening opisa (RO).

“Wok long yumi long Pot Mosbi i stat nau (las wik Trinde), na namba bilong yupela ol enrolmen ejen long Pot Mosbi em i planti tru.

“Namba i winim ol arapela provins. Mi laik salensim yupela long mekim wok stret. Sapos yupela i apim namba bilong ol elijibel vota (o ol lain inap long vot)



Wanpela ilektoet opisa bilong Nesenel Kepital Distrik i wokim awenes toktok long Ela Bis bihain long Wokabaut bilong Enrolmen long Sande 27 Novemba, 2016.

Poto: Nicky Bernard

i go antap, lo i stap long kotim yupela.

“Dispela kain paul pasin i no ken kamap,” Mista Kalamoroh i tok.

Em i mekim dispela toktok long asde long Jack Pidik Park long Pot Mosbi.

Long sefti na sekyuriti, ol polis bilong NCD bai wokbung wantaim PNGEC. Ol tim lida bilong wan wan grup bai stap long CUG mobail fon na ol bai gat namba bilong ol polis man na ol senia opisal bilong PNGEC het opis.

Ol enrolmen ejen bai

kisim yunifom siot bilong ol long dispela Fraide. Stat long Trinde long dispela wik, ol bai mekim ol awenes toktok long skulim ol manmeri long putim nem bilong ol long ilektoral rol.

“Sapos nem bilong yu i no stap long ilektoral rol, yu bai no inap gat sans long vot long nesenel ilekseen long neks yia,” Mista Kalamoroh i tok.

Mista Kalamoroh i tok tenkyu long ol patna bilong PNGEC olsem gavman bilong Australia, Amerika na Nu Silan long givim moa sapot long PNGEC.

Gavman kamapim tras akaun bilong 2017 ilekseen

Aja Potabe i raitim

NESENEL Gavman wantaim sapot bilong Inta-Dipatmen Ilekseen Komiti (IDEC) i kamapim wanpela nupela tras akaun bilong holim ol mani na fan i kam insait PNG Ilektoet Komisina long ranim 2017 Nesenel Ilekseen.

Sif Ilektoet Komisina, Patalias Gamato, i tok bipo PNGEC i save yusim integritet fainensel menesmen sistem (IFMS) long menesim ol

mani tasol dispela sistem i save salim ol mani we PNGEC i no yusim i go bek gen long Konsolideitet Reve-niu Fans (CRF) taim pablik akaun i pas.

“Wantaim dispela tras akaun, ol fan bilong PNGEC bai stap yet na redi long yusim long mekim wok taim ol i pasim pablik akaun.

“Dispela em i gutpela samting bikos mipela bai inap long mekim wok taim gavman akaun i pas long

Disemba 2016 na Janueri 2017 bikos sampela taim gavman akaun i save pas long namba wan an namba tu mun long nupela yia,” Mista Gamato i tok.

Antap long dispela tras akaun, IDEC i kamapim wanpela Speselais Saplai na Tendas Bod we i agt K1 milien.

Dispela i mekim isi long PNGEC i ken yusim moa long K500,000 long mekim ol wok taim pablik akaun i pas.

Aja Potabe i raitim

MANI mak we PNG Ilektoet Komisina (PNGEC) i nidim long karamapim baset bilong lojistiks o ol samting bilong ranim ilekseen long neks yia, i sanap olsem K127 milien, Sif Ilektoet Komisina, Patalias Gamato i tok.

Mista Gamato i tok PNGEC nau i wok long mekim plen bilong yusim ol samting olsem kar na arapela samting we ol bai nidim long ranim 2017 Nesenel na Lokal Level Gavman Ilekseen.

Wantaim bikpela helpim bilong Dipatmen ov Foren Afes na Tred bilong Australia na Nu Silan, PNGEC i wok long redim ol samting olsem kar, balus, sekyuriti, kaikai,

haus bilong ol wok manmeri bai slip, na arapela ol lojistik samting long larim Nesenel na LLG ilekseen long neks yia i kamap gut tru.

Mista Gamato i tok dispela nesenel lojistik plen bai kamap olsem masta plen long larim ol samting we ol wok manmeri bilong PNGEC bai nidim i stap redi tasol long mekim ilekseen wok i kamap isi.

“Dispela plen i karamapim mani mak bilong transpot, ol ilekseen samting olsem balot bokis na pepa, we PNGEC bai salim i go aut long olgeta provins, distrik, LLG na long wan wan ples bilong poling o ol ples we ol manmeri bai vot,” Mista i Gamato tok.

Polis bai kisim K121 milien long ilekseen sekyuriti

Aja Potabe i raitim

SIF Ilektoet Komisina Patalias Gamato i tok polis bai kisim K121 milien aninit long ilekseen baset bilong 2017 Nesnel na Lokal Level Gavman Ilekseen.

Mista Gamato i tok polis bai mekim wok sekyuriti long larim ol manmeri i vot gut aninit long demokratik wei.

“Ol polisman bai kisim K121 milien. Long dispela K400 milien gavman i bin skelim long 2017 Nesnel Baset na givim long PNG Ilektoet Komisina (PNGEC) long ranim 2017 Nesenel Ilekseen, K121 milien bai go long polis sekyuriti operesen.

“K297 milien bai go long karamapim ol ilekseen operesen. Dispela mani mak i lukim 40 pesen bilong ilekseen operesen baset i go antap.

“Long yia 2012 long taim bilong Nesenel

Ilekseen, Nesenel Gavman i bin givim K180 milien. Tasol long neks yia ilekseen gavman i givim K297 milien, ol i apim K117 milien long wankain mani mak ol i bin givim long 2012,” Mista Gamato i tok.

Mista Gamato i tok ilekseen baset bilong 2017 nesenel ilekseen bai sanap olsem:

Lojistiks – K127.30 milien

Fainens – K73.56 milien

Awenes – K15.00 milien

Trening bilong ol Ilekseen Wok Manmeri – K7.00 milien

Arapela Kost (Nupela Ligel Fi) – K11 milien

“K60 milien bai go long sampela ol sevis we PNGEC i kisim long dinau long 2012 Nesenel Ilekseen na 2013 LLG Ilekseen.

“K43 milien bai go long ol ligel fi o mani we PNGEC inap long givim long ol loya, na K17 milien bai go long arapela ol sevis provaida,” Mista Gamato i tok.

Ilekseen petisen fi em K20, 000

Aja Potabe i raitim

OL kendidet husat i sanap long 2017 Nesenel Ilekseen, na i lus tasol ol i laik salensim win bilong narapela kendidet long Kot ov Dispiutet Ritens, i mas gat planti mani bikos mani mak bilong ilekseen petisen bai go antap moa.

Dispela em i toktok i kam long PNG Ilektoet Komisina (PNGEC) bihain long ol i givim ol edvais toktok pinis long gavman long mekim senis long lo bilong ilekseen.

Sif Ilektoet Komisina Patalias Gamato i tok Gav-

man i tokim PNGEC long mekim sampela senis long lo bilong ilekseen, na dispela senis bai lukim mani mak bilong ilekseen petisen i go antap moa long K20, 000.

“Nau fi bilong ilekseen petisen em i sanap olsem K5, 000 tasol stat long 2017 Nesenel na Lokal Level Gavman Ilekseen, ol kendidet husat i lus na i laik go long kot i mas gat K20, 000,” Mista Gamato i tok.

man i tokim PNGEC long mekim sampela senis long lo bilong Nesenel na Lokal Level Gavman Ilekseen.

“Aninit long dispela nupela lo, ol kendidet husat i lus long ilekseen, na husat i laik kisim kendidet husat i win i go long kot, i mas gat K20, 000 long failim ilekseen petisen,” em i tok.

Mista Gamato i tok PNGEC i kisim tok orait pinis long Nesenel Eksektiv Kaunsil (NEC) long kamapim dispela senis long lo bilong ilekseen, na ol i wok long wokbung wantaim ol loya bilong gavman husat i save raitim o senisim lo.

STORI BILONG TUMBUNA

Watpo Porgera i gat gol

B IPO bipo tru, tupela marit i stop long wanpela ples oi i kolim Yarika. Tupela i stap i go na bihain tru tupela i karim wanpela pikinini man na wanpela pikinini meri.

Foapela i stop i go i go na wanpela taim ol sampela lain man i kilim pik na mekim pati. Ol i salim tok long olgeta manmeri i mas i karim samting i go long pati. Orait, tupela papa na mama i harim pinis na i tok.

"Bai mitupela i go long tumora, tasol nau, mitupela i karim kaukau na brukim paiawut na pulimapim wara bilong tupeia pikinini na redi long haus."

Tupela i redim olgeta samting pinis na ol i slip. Na long moning taim tupela i kirap kukim kaikai i stap na ol i tokim tupela pikinini bilong tupela olsem. Yutupela i ken slip long wanpela nait tasol na yutupela i no ken mekim nois na toktok samting. Yutupela i mas pasim dua gut na slip i stap. Bai mitupela i kam bek tumora.

Orait, papamama i tokim tupela

pikinini bilong tupela pinis na tupela i rausim kaukau na i kirap go long pati.

Orait, tupela pikinini i no mekim wanpela nois o singaut samting. Nogat. Tupela i stap isi tasol. Na bihain i tudak, tupela i pasim dua strong tru. Na tupela i kukim kaikai insait long haus na i kaikai.

Tupela i kaikai pinis, orait, tupela i go slip long rum.

Long nait tru tupela i pilim graun i guria na harim ol diwai i pundaun nabaut. Na tupela i pret nogut tru na tupela i no slip. Ai bilong tupela i op tasol i stap inap biknait tru na tupela i harim wanpela stik i pairap na tupela i ting wanpeia man i kam.

Orait bihain liklik tupela i harim wanpela man toktok olsem, "tupela pikinini bilong mi, yutupela i no ken pret. Mi papa bilong yutupela mi kam na bai mi slip wantaim yutupela."

Orait tupela pikinini i no tok na mekim liklik nois samting. Tupela i holim pas gut tru na harim tasol i

stap. Bihain tru dispela man i kirap na i opim dua na i go insait. Em i go insait na i tokim, tupela pikinini: "Mi tumbuna bilong papa na mama bilong yutupela Yutupela i no ken pret long mi."

Em nau tupela pikinini i ting tru na tupela i kam ausait long rum. Man ya em i no luk olsem man tru, Skin bilong em i gat nilnii na i kamap olsem pukpuk.

Man ya i tokim tupela olsem, mi tumbuna bilong yutupela. Mi save lukautim yutupela gut na nau mi kam bilong soim pes bilong mi long yutupela. Nem bilong mi Waigima. Mi save slip antap long maunten Warokari. Em i tokim tupela pinis na em i givim tupela gol ston long tupela na tok, dispela em bihain yu inap kamap maniman. Na yu inap painim planti kain kain samting long dispela tupela golston. Yutupela i ken tokim papa na mama bilong yutupela na yupela i ken painim planti go aninit long graun na long wara tu.

Orait, em i tok, nau em i tulait na



mi go long haus bilong mi. Taim em i go ausait klostu long dua, Waigima i tok, yutupela i ken kam wantaim mi na mi ken soim haus bilong mi long yutupela. Orait tupela pikinini i kirap bihainim Waigima.

Ol i wokabaut i go antap long maunten, na em i tokim tupela em bai i go insait long dispela hul bilong ston. Na taim mi hangre bai yutupela inap lukim dispela kapiak i drai nating na lip bilong em i pundaun. Orait yutupela i mas kilim wanpela pik na kolim nem bilong mi na givim mi klostu long dispela kapiak.

Em bai mi inap kaikai na kapiak bai i kamap na stap gut na yupela inap stap gut tu. Sapos yupela i no givim kaikai long mi, mi inap bagarapim yupela i no inap painim gol tu. Bai gol i lus pinis.

Em i tokim tupela olsem na em i laik i go insait. Nau em i tanim tanim olsem snek. Taim em i go insait, graun i guria na ston na graun i bruk nabaut.

Tupela pikinini i go bek tong haus bilong tupela. Na ol i stap. Bihain papa na mama bilong tupela i kam, tupela i lukim pikinini bilong tupela i stap. Papa bilong tupela i askim tupela. Husat i kam long nait? Em tumbuna bilong mitupela

Waigima i kam slip wantaim mitupela na mitupela i bringim em i go antap long maunten Warokari na mitupela i kam bek. Tupela i tokim olgeta stori Waigima i bin tokim tupela long en.

Orait, nau papa na mama bilong tupela i harim na kisim stori bilong tupela pikinini pinis, na ol i kaikai pik na sampela ol kaikai em papa na mama i karim i kam. Ol i sindaun i go na taim lip bilong kapiak i drai ol i save kisim na givim Waigima.

Ol i mekim olsem na i stap i go, na bihain tupela papa na mama i dai na tupela pikinini tasol i stap.

Tupela i marit na karim wanpela pikinini man. Tupela i kolim nem bilong em Tiyani na em i wokim famili i go na nau ol lain Tiyan i stap long dispela ples Yarika. Na nau ol i painim gol na wok long gol na kisim planti mani long gol.

Na tu, ol lain man Tivani ol i mekim olsem Waigima i bin tokim ol long en. Nau tu, ol i kilim pik yet taim ol i lukim lip bilong kapiak i drai.

Nau ol Maun Aisa Main Kampani i kam na ol i kamapim bikpela wok tru i kamap nau, nau mipela i wok i stap yet i kam inap nau.

Joe Nandawa,
Porgera/Enga

PAINIM WOD PILAI

Ol wod lista:

KARAPELA
FIFTI
BIKRUM
ANKA
GREVI

KAKANG
LOKAP
MELEK
ORAIT
KOMPAS
PILO
SKELIM

TRESARI
YAMBO
ANIMAL
BAGARAP
ETPELA
GUTTAIM
HOLIDE

KAIS
LABULA
MALUMALU
PAKLAIN
NAINPELA
RONOWE
SINDAUN

N H A I S E Y B N R I A E E R G H V H A I R G Y J
L U F R L I K U X E V N B S R N R P B D E S D O K
L V Z E E R A H R O T V I I C A U Y H T O S L A C
W H G I G T E T S R Y A K L V A O T R E M H N J I
S N F J F K P O P A K I R H E I R Y N E J A N E T
O E O O S A O E E I L U U C R T G G E E G E R U C
S R I I Y Q Y M L T L A M Y O I C D I I E J O I G
T F I F T I S A P A K L A I N E H C E C Y N A T F
R P S G E S K N M A B R H R O B I Q S O T T S V M
C O N N M T E U X B S U O C W X B X A N S P D J A
O L A M A K L P I L O D L E E H S E O J R G Z T N
F D O K N A I N P E L A I A I O B G E M N E B I I
E B N K M R M T E O N H D V S J I C O X E C O K M
Y A Z I A A A W R G D J E X G I L G L Z H Q C I A
Q G F S O P S K F R F R R K E E N S A I Q F A K L
M A E L U E E I S F G E X G A A G D H O L T J A N
O R S R N L T X N L H Z T S K L G L A G T I E I Q
T A O G E A X S N S O H Q A A F E E R U D E R F I
S P T M E X F I F L K T K T I L S H G S N A O F D
S I B N R J E F T M C I M Q V X M C Y E I D C S L

Ansa bilong Wod Pilai isu 2203

F S E M H F R F J B S I E A N I C E S R B M I R M
E A O N E S N E P O S J R N G W O N F O I A S H A
A H P O W F B R H E P A E A T I N J Y M P P O L E
N O S P T A P U Q Z O H K N R F T S O O T T E B C
A D I T S L R A C L Q L U A K B I K P L E S B N X
Z S K Y P T I N H O N L D S L E T A T D K C E O C
E S E E J O E T O X B E H A I W A R A U I X T E Z
W O S D B C O R N L H J Y A N G R S T O M N A M G
S T J M S N M B D D B B O E N E A A N C A W I N D
H A O A A K E S W R F A M I L I G T U M U A A K E
T D C U S Q P T V T I I W I N K A G S N T P R H
A C Y U E Q O O H I D N I H S A U N S G A C E U R
D R N H N T S E D Q A S S T W I S W N N S B S N O
O S O A T J L O E W Q Q D L I N S O I A I N A G G
W I G G P O O R I C F U O P M W L B T H E I K U U
P M E H E N E J L V A P W E R S C S V W A S D T T
F N I Y O E C R H P P Z K T L O A T Q P I L I I N
F M C H H J K H H R E O E T H M I K R N K N R M I
H N T H G C N A N L N G S H B I T R P X N L B Y U
T R H F S L N I G C A N G E L S H E K R H A P A S

John Key em New Zealand Praim Minista bai risain klostu taim

JOHN Key, New Zealand praim minista na lida bilong Nesenel pati i mekim ol pipel i kirap nogut taim em i tok long risain long wik antap.

Mista Key i bin toktok insait long wanpela midia konfrens long Wellington long dispela wik na toktok bihain long em i tok save long kebinet olsem em bai lusim sia bilong Praim Minista.

Em bai lusim opis long 12 Desemba taim ol Nesenel memba bai holim wanpela spesel miting long makim nupela lida.

Key i tok em bai makim deputi praim minister, Bill English, sapos em i putim em i kam olsem wanpela kendidet bilong Praim Minista.

English i bin lida long pati sotpela taim pastaim long 2002 ileksen we ol i bin lus tasol bihain long dispela em i bin stap olsem wanpela gutpela minista bilong fainens.

Planti pipel i save laikim John Key olsem em i wanpela gutpela praim minista long histori bilong New Zealand.

Em i tok olsem disisen bilong lusim sia bilong Praim Minista em i wanpela hatpela disisen tru em i mekim, tasol em i tok, ino inap long em bai stap long pinisim dispela namba 4 taim bilong em i stap olsem Praim Minista.

Em i tok em i pilim olsem nau em i rait taim long em i go. "Sampela taim yu mas mekim ol hatpela disisen," em i tok. Na em i tok moa olsem em i sans bilong ol nupela man long kisim lidasip bilong Nesenel Pati long namba 4 taim.

"Mi ting olsem wanpela as we ol gavman i save pun-daun long namba 4 taim bilong ol em long ol lida i no save laik long lusim wok, bikos olgeta lain i save tok,

'mi lukim dispela kain samting pinis bipo'. Nau em i sans long soim nupela samting mipela i kamapim.

Em i sori long wanpela samting tasol em long em i no bin inap long bringim Pasifik Patnasip i go long narapela sait, na tu em i no bin inap long senisim plak.

Em i tok olsem em i bin 'toktok longpela taim' long sanap gen long namba 4 taim, wantaim meri bilong em, Bronagh Key.

"Mi no pilim gutpela long lukluk i go daun long wanpela kamera na i no tok tru. Long famili sait, mi no ting bai mi stap moa winim narapela ileksen," em i tok.

Em i tok strong olsem Bronagh Key i no bin makim taim bilong em long em i pinis long wok olsem Praim Minista.

"Meri bilong mi i bin winim moa long 10-pela yia taim em yet i save stap sori long nait na nau em i rait taim long mi kam bek long haus."

Key i tok em bilip olsem mak bilong gutpela praim minista em long man husat i ken kisim kantri i go long gutpela taim long taim em i kisim opis.

"Sampela taim bihain ol narapela lain bai i ken skelim sapos mi mekim gutpela wok o no gat," em i tok.

"Mi bai tok tasol olsem mi bin mekim olgeta samting long strong bilong mi na mi no larim wanpela i stap bek long tenk."

Em bai stap long palamen liklik taim moa long ol i no ken holim wanpela bai ileksen, tasol em bai lusim sia olsem wanpela MP pastaim long ileksen i kamap. Em i tok em i lusim sia wantaim bilip olsem, 'New Zealand i bin kisim gutpela sevis long gavman mi lida long en.'

Wes Papua At so long Melbourne

Caroline Tiriman i raitim

WANPELA lida bilong ol Wes Papua komyuniti long Australia i laikim ol Pasifik Ailan pipel, na tu ol pipel bilong Australia long joinim ol long selebretim Sampari Art Exhibition bilong soim kalsa bilong Wes Papua long namba wan wik bilong Desemba.

Ronnie Kareni i mekim dispela askim taim ol i redi long opim dispela so long Australian Catholic University Art Gallery long Melbourne we bai stat long Fraide namba 2 Desemba i go inap long namba 11 Desemba.

Bai gat ol kain samting olsem, musik, ol peinting bilong Wes Papua na ol narapela Melanesian kantri olsem Fiji, Nu Kaledonia, Solomon Ailan na Vanuatu.

Em i tok bai gat tu ol kaikai em ol Melanesian pipel i save laikim.

Mista Kareni i tok, ol pipel bilong Wes Papua em ol i Melanesian pipel na dispela At so bai soim ol kalsa bilong Melanesia i wankain.

Caroline Tiriman i raitim

BIKPELA pilai bilong Fifa Under 20 Women's Wol Kap long PNG i helplim gut tru ol wok bilong soim PNG long ol narapela kantri long wol.

Sif Eksekutyv Opisa bilong

Wes Papua Fleg De selebresen long Pasifik



Ol memba bilong Solomon Ailan i sapotim ol Wes Papua i selebretim de bilong ol long Honiara.

Caroline Tiriman i raitim

OL Wes Papua indipendens sapota long Papua provins bilong Indonesia yet, long sampela Pasifik ailan kantri wantaim tu long Australia na wol i makim namba wan taim we ol pipel bilong Wes Papua i apim Morning Star indipendens fleg bilong ol.

Em i bikipela de bilong ol Wes Papua pipel long wol we ol i apim Morning Star fleg bilong ol na soim laik bilong ol long kisim fridom long lusim Indonesia.

Dispela i makim de we Holland i bin larim ol pipel

bilong Wes Papua long flaim Morning Star long redim long kisim indipendens 55 yia i go pinis.

Dispela plen bilong ol i bin bagarap taim gavman bilong Indonesia i bin go na mekim ol pipel i vot long wanem ol i kolim nau olsem vot bilong fri sois long kamap olsem hap bilong Indonesia.

Tasol planti pipel bilong Wes Papua i go het yet wantaim pait bilong ol long lukautim ol yet.

Sampela Wes Papua selebresen tu ol i wokim long sampela hap long PNG, Solomon Ailan na Vanuatu.

Long Honiara tude, ol lain bilong Solomon Ailan in Solidarity for West Papua i apim Morning Star fleg tu bilong selebretim dispela de.

Long Vanuatu, Pastor Allan Nafuki, Siaman bilong Wes Papua Yunifi kesen Komiti i bin go pas long seremoni long Port Vila.

Long Melbourne, ol Wes Papua komyuniti wantaim ol sapota bilong ol bilong Australia i bin bung long makim dispela de we Wes Papua ektivis, Ronny Kareni i wanpela long ol we i go pas long en.

PNG i benefit gut long hostim FIFA U20 WWC

Caroline Tiriman i raitim

BIKPELA pilai bilong Fifa Under 20 Women's Wol Kap long PNG i helplim gut tru ol wok bilong soim PNG long ol narapela kantri long wol.

Sif Eksekutyv Opisa bilong

PNG Tourism Promotion Authority, Jerry Agus i mekim dispela toktok taim Korea DPR na France i redi long pilai long Gren Fainel long Pot Mosbi las wik.

16 pela soka team bilong ol kantri bilong Not na Saut Amerika, Yurop, Esia, Afrika

na Pasifik i bin stap long dispela bikipela pilai we i bin stat long Novemba namba 13 na pinis long Desemba 03.

Long wik i go pinis National Geographic Travellers Magazine i bin makim PNG olsem wanpela long 21 ol

kantri long wol em ol turis i mas go lukim.

Mista Agus i tok dispela bikipela pilai i soim Wol olsem PNG em i stap long Pasifik rijon na em i gat ol kain kain gutpela samting we em i no stap long ol narapela kantri.

BE A LUCKY WINNER TODAY!

CHECK-IN FAST! CHECK-IN ONLINE!

Be in the draw for a chance to win a trip for 2 to Pohnpei, Federated States of Micronesia. Be a smart traveller and check in Online today!

Air Niugini
www.airniugini.com.pg

Check-in Online & Win
3 x draws! Oct, Nov & Dec

Avoid the airport queue! Online Check-in is available on www.airniugini.com.pg from **24 hours to 3 hours** before departure. Not available for flights departing Australia and Japan.



INVESTMENT TOKTOK

wantaim DR. STEPHEN NASH

Toktok bilong Baltic Drai Indeks

1 Tok i go pas

Ol fainensel maket i wok long mekim planti samting, pastaim long win bilong nupela US presiden Trump we ol fainensel maket i no bin ting bai kamap, maski ol i bin pret long dispela samting bai kamap; planti bilong ol i bin tingting olsem ol maket bai "tromoi hevi" long "Trump". Long narapela sait, ol fainensel maket i wok long mekim wok wantaim tingting bilong Federal Risev bai strongim ol maniteri polisi long Desemba, 2016. Dispela kain wok em bai kamap yet, na Federal Risev nau inap long putim aut wanpela kain strongpela han, biko slong ol kain developmen na fainensel maket prais. Long narapela sait, ol fainensel maket i bin wok long long ivaluetim ol developmen wantaim planti kain sain, wantaim wanpela we nau bai mipel ai toktok long en long hia; em Baltic Drai Indeks (BDI).

Bihainim dispela samting, na wantaim dispela tingting, insait long dispela hap toktok ol dispela samting bai mipela i toktok long ol:

- wanpela tok klia bilong BDI bai kamap ,
- wanpela tok klia bilong wanem na BDI em impoten,
- ol bai soim sampela nupela senis long ol prais bilong BDI, na
- baik kamap wantaim sampela tingting p.

2 Toktok klia bilong BDI

As tru bilong BDI em olsem, em i wanpela wei bilong soim mak bilong ikonomi bilong ol kost bilong kisim ol risos bilong bus na graun, na em i save kam long Baltic eksens ples long London. Lukluk klostu moa, em long wan wan de bilong wok , wanpela lain sibbroka i save putim mak bilong kost bilong karim ol kago i go long ol kain kain rot bilong solwara long wol. Ol i mekim planti kain senis long inapim ol namba wan namba mak long em bai kamap gutpela sain o mak bilong wanem kain kost ba kamap taim ol nupela samting bilong salim i go long sip.

3 Bilong wanem na BDI em impoten

Pastaim long y slip, yu mas luksave olsem long siping maket BDI em i impoten bikos em l save makim objektiv kwantitativ mesa bilong balens. Long narapela sait, em i save balensim singaut bilong ol siping freit sevis, long karim ol nupela indastri samting i go. Sapos namba bilong ol nupela indastri komoditi long wol i go antap, orait ol narapela samting tu bai bihainim dispela mak, olsem kost bilong karim ol nupela samting bilong salim long sip bai i go antap. Tasol long sait bilong saplai, taim bilong wet long wokim sip i min olsem palnti taim, skel bilong siping sevis em i save stap long wanpela mak tasol. Em i minim olsem, wantaim ol narapela samting, sapos singaut bilong sevis i go antap, tasol saplai l stap long wankain mak tasol, bai prais bilong siping freit i go antap. Olsem na bikos BDI i save skelim ol dispela senis bilong ol prais long siping sevis, em i save givim sampela piksa bilong wok bilong ol nupela samting bilong bus na graun bilong salim i go long wol.

Em olsem, BDI i save soim wok bilong globol ikonomi.

4 Ol senis nau i kamap

Long mun Me 2008, BDI i kamapim wanpela mak antap tru, taim em i kisim 11,793 poin. Taim hevi bilong fainens i go bikpela long wol, na kirap nogut BDI i pundaun; long Desemba 2008, BDI fallen pundaun i go daun olgeta long 663 poin. Taim singaut bilong ol samting bilong baim i pundaun, taim bilong karim ol samting i go i kam tu i go daun, na kost bilong siping to i pundaun.

Bihain taim gutpela taim i kamap gen, na BDI i kirap gen na singaut bilong freit sevis i go antap gen, i go long mak we BDI i go antap bek long mak bilong 4661. Taslo BDI i rong long em i no holim strong long dispela mak antap na em i salim ol samting long les pasin inap Februari 2016, taim BDI i kisim mak daunbilo olgeta long 290. Long hia nau singaut bilong ol globol siping sevis i bin stap daunbilo long planti hap.

I no longtaim i go pinis, long Novemba 15 2016, BDI i kalap i go long moa long 1000, na dispela i traim long soim olsem olsem ol globol wok long bihain nau bai stat long go antap, na olgeta samting bai kamap wankain. Sampela bilong ol dispela developmen i stap long piksa aninit.



Figure 1

5 Pinisim tok

Insait long dispela hap toktok, mipela mekim tok klia long BDI, na tu long wanem as BDI em i impoten long lukluk long en. Tasol, BDI em wanpela tasol bilong ol ikonomik indiketa, olsem na i no gat lain i mas war long wanem we ol i yusim BDI. Tasol taim BDI i wok long go antap gen, i laik sapotim bikpela tingting long globol gro, na dispela tingting na i no narapela kain tingting moa bilong 'Donald Trump tok-tok', we i wok long sapotim ikwiti prais long dispela taim. Na tu, em i impoten long save olsem, bikpela tingting bilong prais, hap we i kamap bikos long ol senis i kamap long BDI nau, bai kisim traim long US Federal Risev, taim Federal Risev i putim aut agenda bilong bilong strongim sampela mani polisi insait long 2017, na ol yia i kam. Ol dispela em sampela ol hevi we globol ikwiti maket i bungim, insait long taim bilong ol bikpela senis i kamap long ol pipel long ol kantri olsem UK i bruk lusim EU, na Trump i win long US presiden. Moa mak bilong ol senis i kamap wantaim ol senis bilong ol kantri na pipel bai kamap yet insait long dispela yia, na narapela yia i kam, long taim ol ileksen i kamap long ol kantri bilong Yurop.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

BIGGER, BETTER, SAFER,
STRONGER AND STILL NUMBER 1

PNG tokim Russia long kam inves

PNG i tokim Rasia long kam inves na mekim bisnis long kantri, Minista bilong Tred Komes na Indastri, Richard Maru, i tok.

Mista Maru i tok PNG na Russia wantaim i tupela memba kantri bilong APEC, na tupela kantri i laik opim tred na invesmen.

Russia na PNG i no save mekim bisnis o i no save kamapim tred na invesmen namel long tupela kantri.

Dispela bai kamap namba wan taim long tupela kantri i stat long mekim bisnis.

Mista Maru i mekim dispela toktok long las wik long Pot Mosbi taim em i kambek long kantri bihain long em wantaim Praim Minista Peter O'Neill i bin go long bung bilong APEC long Lima long Peru.

"Dispela em i sans bilong PNG long kamapim nupela maket long salim ol samting. Mipela i no

save mekim bisnis wantaim Russia, na nau em i gutpela taim long yumi stat mekim bisnis wantaim ol," Mista Maru i tok.

Mista Maru i tok PNG i amamas long opim dispela nupela maket na stat mekim bisnis wantaim Russia.

Mista Maru i bin bungim Minista bilong Tred na Komes bilong Russia long taim bilong APEC bung long Lima wik i go pinis.

"Mitupela i bin bung long Lima, na mi tokim em olsem PNG i redi long mekim bisnis wantaim Russia," Mista Maru i tok.

Mista Maru i tok wanpela tred delegesen bilong Russia bai kam raun long kantri long pinis bilong mun Febuari long neks yia na ol bai kam lukim ol sans bilong mekim bisnis long PNG.

"Ol investa na bisnis bilong Russia bai kam long hia, na mipela i wok long mekim ol wok long larim dispela i kamap.

PNG bai salim tred delegesen long Nu Silan

PNG bai salim wanpela tred na invesmen delegesen i go daun long Nu Silan long mun Jenuari neks yia.

Tred, Komes na Indastri Minista, Richard Maru, i tok dispela tred na invesmen delegesen bai go daun long Nu Silan long bung bilong invesmen rot so.

Mista Maru i bin toktok wantaim ol opisal bilong Nu Silan taim ol i bin bung long APEC bung long Lima long Peru tupela wiki go pinis.

"Mipela i amamas long lukim olsem Nu Silan i laik givim mipela sapot long larim mipela i salim sampela ol prodak bilong mipela long maket long Nu Silan," Mista Maru i tok.

Em i tok aninit long wanpela spesel agrimen, Nu Silan bai larim PNG i salim sampela prodak i go long maket bilong ol, na tu larim Nu Silan i bringim sampela investa i kam long PNG.

Mista Maru i tok ol i wok long stretim toktok long larim ol manmeri PNG i kisim visa long ples balus long Nu Silan sapos ol i laik go raun long mekim bisnis o raun

Minista bilong Tred, Komes na Indastri, Richard Maru.

nating long malolo.

"Ol gavman delegesen i wok long toktok wantaim ol opisal bilong Nu Silan long larim ol manmeri PNG na ol manmeri Nu Silan i kisim visa on ples balus," Mista Maru i tok.

Em i tok Nu Silan i wanbel long soim ol faktori na sampela indastri bilong ol long ol bisnis delege-

"Russia i laikim wanpela Memorandum ov Agrimen (MoA) long Tred na Ikonomik Koperesen i mas stap wanatim PNG.

"Bihain long en, dispela MoA bai inapim ol bisnis delegesen bilong Russia long kam lukluk raun long PNG.

"PNG nau i wetim Russia long kamapim dispela agrimen na gavman bai skelim na lukim dispela agrimen.

"Gavman bai sainim dispela agrimen na kisim ol investa na bisnis manmeri bilong Russia i kam insait long pinis bilong mun Febuari neks yia ," Mista Maru i tok.

Mista Maru i tok ol bai toktok wantaim Russia long stretim skolasip long ol sumatin bilong PNG long go skul long Russia.

Mista Maru i tok ol bai tokaut long bihain taim long wanem kain ol bisnis Russia bai mekim wantaim PNG.



Total statim envairomen stadi

OL opisal bilong Total SA bai go lukluk raun long 43 ples insait long Petroleum Ritensen Laisens (PRL) 15 long Galp Provins.

Dispela raun bilong ol wok manmeri bilong Total em long skelim ples na lukim ol samting pastaim long ol bai mekim stadi bilong envairomen.

Envairomen na Sosel Menesa bilong Total, Jeremy Roeygens, i tok i no gat wanpela ples we i gat

manmeri i stap klostu long projek eria bilong ol.

Mista Roeygens i tok Total i wok long skelim gut ol envairomen, ples we ol manmeri bai stap long ne, ol wara na bus.

Ol i les long projek i bagarapim envairomen, Mista Roeygens i tok.

"Mipela i les long bagarapim sindaun bilong ol manmeri. Mipela i les long projek kamapim


birua na hevi long bus, graun na wara.

"Manmeri na bus, graun na wara em ol namba wan samting long laip bilong man. Mipela i laik stretim ol samting bilong envairomen, na larim ol i stap gut," Mista Roeygens i tok.

Total em i kampani bilong Frans na em bai kamap opereta blong namba tu LNG Projek long PNG, Papua LNG Projek.



STAP SEIF WANTAIM ILEKTRISITI!



NOKEN LARIM DIWAI I GRO KLOSTU LONG PAWA LAIN




LUKAUT LONG OL PAWA LAIN ANTAP TAIM YU MEKIM WOK ANINIT



NO KEN LARIM OL PIKININI I HOLIM OL PAWA POIN. EM I GAT BIKPELA BIRUA NA INAP LONG KILIM OL.




No ken bungim wara wantaim pawa. Em ino seif



Yu no ken holim wampela pawa lain we i pundaun long graun! Em inap long kilim yu i dai.



NO KEN GO ANTAP LONG OL PAWA POS NA OL BIKPELA PAWA PAILON WE I KARIM OL LAIP WAIA. EM I NO SEIF.



OVA LOD LONG OL PAWA PLAK INAP LONG KAMAPIM PAIA.

NOGUT KRISMAS LAIT



GUTPLA KRISMAS LAIT



PNG PAWA I LAIK TOKSAVE LONG OLGETA MANMERI LONG NOKEN BAIM OL KRISMAS LAIT WE IGAT LIKLIK WAIA

OL DISPELA LAIT IGAT BUN PLASTIK WAIA KARAMAP NA PLAG TU INO GUTPELA. PAIA IKEN KIRAP LONG EM.

OLGETA TAIM YUPELA I MAS BAIM OL KRISMAS LAIT I GAT BIKPELA PLASTIK KARAMAP LONG WAIA NA IGAT GUTPELA PLAG OLSEM PIKSA ANTAP I SOIM.

SAPOS YU LAIK BAIM KRISMAS LAIT YU MAS ASKIM STOA KIPA LONG SOIM APRUVOL SETIFIKET BILONG PNG PAWA.



NO KEN KUMIM PAIA LONG AS BILONG PAWA POS. EM I GAT BIRUA



No ken yusim ol hap ain long rausim ol prut long ol diwai i stap klosut long ol pawa lain. Ilektrisiti inap long kilim yu sapos yu go klostu tumas.



Su bilong yu i mas stap long lek na i no antap long pawa lain.



Ol pikinini ino ken pilai aninit long ol pawa lain. Em ino seif



Taim yu lukim pawa lain i pundaun, yu mas hariap lo toksave long ol PNG Pawa ofis istap klostu long yu

PLIS YU MAS GIVIM OLGETA RIPOOT BILONG OL HEVI BILONG PAWA LAIN I GO LONG NESANEL KOL SENTA

Scott i toktok long kontrak bilong em



Matt Scott i stat toktok long kontrak bilong em wantaim ol Cowboys.

PROP bilong Kangaroo, Matt Scott, i stat toktok long kontrak bilong em wantaim ol Not Kwinslan Cowboys.

Not Kwinslan futbol bos, Peter Perr, i tok klia olsem em bai hat long ol bai sainim gen kontrak bilong ol NRL pilaia bikos ol i no save long sait bilong kisim pei.

Ko-kepten, Matt Scott na Johnathan Thurston, stap top long lista bilong ol

namba wan pilaia bilong Cowboys mani mak long \$5 milien we tupela bai no inap stat insait long kontrak long 2017.

Parr i tokaut olsem Scott i toktok pinis wantaim ol Cowboys tasol em i askim long stap isi na wet.

“Dispela em i wanpela hat taim, sapos yupela i traim long toktok long kontrak. Em bai orait, tasol em i hat

liklik,” Parr i tok.

“Mi ting olsem yupela i lukluk long mekim nupela kontrak bai kisim planti taim. Bipo i bin isi liklik, tasol nau ol i mas stap isis na wet.”

Ol Cowboy i lukluk go het na toktok wantaim Scott, husat i laik pilai narapela tupela sisen gen.

Neks yia em i namba 14 sisen bilong em long pilai wantaim ol Cowboy.

Kashima i pinisim ol nogut rot long win



Kashima Antlers i amamas long ol i winim J1 Lig taitel.

KASHIMA Antlers i winim namba 8 J1 Lig taitel bilong ol wantaim namba wan kala bilong em na i kisim wanpela ples long FIFA Klap Wol Kap Japan 2016.

Ol i isi tru kapap wina we Antlers i painim sampela rot long wasim namba wan taitel bilong ol insait long 7-

pela yia.

Antlers i daunim Urawa Reds wantaim gol rul bihain tupela-lek sempion fainal ol i bin pinisim wantaim 2-2.

Ol Red i stap top long dispela sisen we ol i bin kisim 15 poin pas long ol Kashima na i stap pas, 1-0, bihain long namba wan lek, tasol

2-1 win bilong ol Antlers long bekim resis i givim ol taitel.

Kosa bilong ol Kasima, Masatada Ishii, i tok, “Mi i amamas long winim dispela sisen na dispela win i mekim na mipela i kisim ples long FIFA Klap Wol KapJapan 2016 resis.

Rosberg na Mercedes i kisim sempionsip tropi

NICO Rosberg bilong Mercedes na ol Mercedes i kisim wol sempionsip tropi long Fraide nait na ol Mercedes tim bilong em i kisim silvawe bilong 2016 yia prais bilong FIA long Vienna.

Rosberg i bin tokaut long de wan long em bai lusim Fomula 1 kar resis. Em i bin

pinisim 9-pela Grands Prix long ol 21 rut.

“Mi gat bikipela amamas long kam long hia bikos em i kisim bikipela taim long winim driman bilong mi taim mi liklik boi,” Rosberg i tok.

Papa bilong Rosberg, Keke, i bin win tu long wol

sempionsip long 1982.

“Taim mi lukim dispel tropi long namba wan taim, mi go na lukim papa bilong mi long givim em bikos em i bikipela samting ol em,” Rosberg i tok.

Daniel Ricciardo i bin pinisim namba 3 na kisim tropi bilong em.

(L-R) Lewis Hamilton na Nico Rosberg bilong Mercedes, na Daniel Ricciardo i kisim 2016 FIA Prais bilong ol.

Colin Lal i mekim gut long asples



Collin Aloysius Dhani Lal em i namba 6 we ol Fiji i pilai egensim ol Guam long 2016 FIBA Anda 18 Osenia Sempionsip resis bilong ol man long Preliminari Raun.

Fiji, husat i lukautim Federe-sen Intenesenel Basketbal Asosiesen (FIBA) Anda 18 Osenia Sempionsip i sainim namba wan win bilong ol long de namba tu bilong resis egensim ol Tahiti.

Ol Fiji i stap pas yet taim resis i stat we ol i bin daunim ol wantaim 16 poin. Fainal skoa bilong ol i

sanap olsem 65-49.

Pilaia bilong ol Fiji, Colin Lal, em i pilaia husat i go pas na soim stail bilong em long ol i kamap wina. Em i bin kisim 21 poin, 6-pela bod, tupela helpim na em i bin stilim bal 6-pela taim.

“Em i bikipela samting tru long pilai long asples pilai graun na winim namba wan

gem. Mi hat long toktok bikos ol bai i amamas. Mipela i winim dispela pait, tasol pait i no pinis yet,” Lal i tok.

“Long winim dispela tonamen em i bilong winim gol na kwalifai long 2017 Anda 19 Wol Kap Sempionsip long Egypt na mipela i makim dispela nau na mipela i lukluk long winim dispela mak.”

Australia na Nu Silan i amamas yet



Ol Tahiti i bin pilai egensim ol Fiji long 2016 FIBA Anda 18 Osenia Sempionsip bilong ol man.

NU SILAN i opim resis wantaim namba wan kala we ol i bin skoaim moa long 26 poin insait long wanpela kwata long FIBA Anda 18 Osenia Sempionsip 2016.

Ol i bin daunim ol Nu Kaledonia we ol i no bin kisim wanpela poin na ol Samoa

tu i painim hat long daunim ol Nu Silan. Skoa namel long Nu Silan na Samoa i sanap olsem 122-35.

Ol Guam i bin daunim ol Fiji long wankain taim na ol i kisim moa strong bipo long salensim ol Australia.

Ol Guam i salensim ol Aus-

tralia we ol i bin pilai wankain, tasol ol bodi bilong ol Australia i kamap bikipela na ol i no givim wanpela spes long ol Guam long kisim sampela skoa.

Ol Australia i daunim ol wantaim bikipela poin, 117-41.





MRA na KBK Ltd bai pinisim Enequai haus tisa projek klostu



Bisnisan Edward Kiza toktok wantaim Megistret meri bilong Enequai, Seta Tigavu.



Ol Gret 8 sumatin redi long greduet.



Sampela bilong ol klasrum we KBK i wok long em nau.



Ol KBK bikman husait i sindaun na harim toktok long taim bilong greduesin.



John Opotio long KBK Ltd na Nick Waipuk long MRA i lonsim projek

MINEREL Risos Atoroti (MRA) na KBK Ltd i givim strongpela tok promis long ol papagraun bilong Ramu Projek long Enequai, Madang provins olsem tupela bai pinisim dispela building Projek long St. Edward Enequai Paimereri Skul na neks yia 2017 bai ol tisa na sumatin i yusim.

Mineral Risos Atoroti (MRA) bin kisim dispela K2.5 milien projek bilong 3-pela dabol klasrum, 3-pela haus bilong tisa na wanpela dupleks haus bilong helt woka lain long Enequai Rilokesen eria. Nesenel Plening Dipatmen i bin givim dispela kontrak long MRA we MRA i givim i go long KBK Ltd, papagraun kampani bilong ol lain Bundi we Ramu NiCo Main i sanap long en. Ol kapenta nau i wok long ol dispela haus nau na long Januери 2017 bai pinis.

Dispela K2.5 milien i karamapim tu narapela ol haus bilong tisa na klasrum long Daunagari Paimereri Skul we i stap long narapela rilokesen eria bilong Ramu NiCo. KBK Ltd bai wok bihain long ol dispela haus taim Enequai haus i pinis.

MRA Lieson Opisa long Madang, Nick Waipuk na KBK Ltd Jeneral Menesa, John Opotio i bin tokim ol papamama, sumatin na ol pablik long Enequai long taim bilong greduesen bilong St Edward Enequai Paimereri Skul olsem olgeta klasrum na haus bilong tisa bai pinis neks yia Januери na bai redi long ol pikinini na tisa bai yusim.

Dispela 15-pela haus projek em MRA i bin givim las yia tasol mani sot na nau ol i givim gen long bai pinisim we Woks Dipatmen bilong Madang i kodenetim.

Mista Waipuk i tok MRA i amamas long kamapim kain projek aninit long luksave bilong Ramu NiCo Projek MOA tasol i salenesim ol papamama na ol pipel long mas lukautim dispela kain projek na moa bai kam.

"Na tu ol dispela klasrum mas noken empti. Salim moa pikinini kam long skul na olgeta klasrum mas pulap. Kantri i nidim moa dokta, ailot, loya na kain kain save man meri," Mista Waipuk i salensim ol papagraun.

Mista John Opotio i tok ol kapenta i nau wok long ol dispela haus na next mun tasol bai ol haus i pinis.

"Ol papagraun i bin komplem olsem mipela kaikai mani na i no yusim gut. Dispela i no tru bikos MRA i no bin givim mani. Nau bai mipela pinisim ol dispela haus na ol tisa na sumatin i ken yusim long kisim gutpela save," Mista Opotio itok.

Kapenta na supavaisa bilong ol dispela haus, Akaka Waima i tok 40-pela kapenta na 10-pela sumatin long Bau Vokesenel Skul husait i lainim wok kapenta i nau wok long ol dispela haus na bai pinis klostu taim.

Tupela skul, St Edward Enequai Paimereri na

Daunagari Paimereri bai i benefit long dispela ol haus projek aninit long luksave bilong Ramu NiCo MOA we gaveman aninit long MRA i mas wokim ol dispela klasrum bilong ol skul we papa graun i ken benefit.

Mista Opotio, em yet pikinini Bundi i tok olsem edukesen bilong Usino-Bundi pikinini em impoten na em olsem general menesa bilong KBK Ltd husat i wok long ol haus bai wok hat stret na pinisim ariap.

Het tisa bilong St. Edward Enequai Paimereri skul, Sima Junget i tok tenkyu tru i go long MRA na KBK Ltd long promisim olgeta lain olsem klasrum bai pinis ariap. Long wankain taim long Trinde las wik, em askim Mista Opotio na Mista Waipuk long lonsim dispela projek we tupela i katim ribbon.

St. Edward Enequai Paimereri Skul na Daunagari Paimereri Skul em tupela i stap ananit long luksave bilong Ramu NiCo Projek MOA olsem wanpela komitmen long ol stekholda.

Bikpela graun breking seremoni i bin kamap long Enequai Rilokesen eria long Fraide Epril 17, 2009 long Ramu NiCo i ken stat long wokim ol haus bilong ol papagraun. Long March Tunde 8, 2011, olgeta haus i bin pinis na kampani i bin givim ki bilong haus i go long gavman we bai lukautim ol dispela samting olsem MOA i tok.


Taim ol haus i bin pinis, MRA i fandim dispela ol klasrum las yia aninit long luksave bilong Ramu NiCo Projek MOA we tude ol pikinini bilong Nokomboi, Maure, Pakaizi na Imuruba klen na ol narapela i kisim helpim long en tude.

Bipo Siaman na man i bin go pas long dispela projek, David Tigavi i bin tok long Fraide, Epril 17, 2009 long graun breking seremoni bilong Enequai Rilokesen olsem, "Yumi mas amamas long ol kain developmen na senis insait long eria na asples bilong yumi na rispektim yumi yet long gutpela bilong tumora."

Meri megistret na lida meri, Seta Tigavu i makim maus bilong ol mama Bundi long las Trinde na tok, "Kain skul na developmen em mas kamap strong na ol Bundi i mas wok long graun bilong ol yet na no ken kamap kagoboi bilong ol narapela lain."

Lidaman bilong Bundi, bipo dokta na nau bisnisan na papa bilong Tamane Guest Haus long Madang i tok, "knowledge o save, bisnis na mani bai senisim Usino-Bundi na St. Edward Enequai Paimereri skul bai kamapim planti save man."

Pikinini Bundi na jeneral menesa bilong KBK Ltd husait i wokim ol haus i tok, "Mi luksave olsem dispela ol klasrum na haus bilong slip bai bringim bikpela senis i kam long Bundi, na mi bai wok hat long pinisim ol klasrum hariap."



Pasifik Women's Sport Lidasip Program i stat

NAMBA wan Pasifik Women's Spot Lidasip Program i stat long Pot Mosbi long Mande, 5 Desemba, i go inap long 9 Desemba 2016, long Holiday Inn.

Program i lukim 20 meri long olgeta hap bilong Pasifik i makim 6-pela spot na i kam long Papua Niugini.

Program i bringim ol meri lida long spot seksen long Papua Niugini, Fiji, Samoa, Tonga, Vanuatu na Nauru long bung.

Ol 20 meri i makim 13 spotting ogenaiesen i bung long developim lidasip skil bilong ol aninit long spot na givim strongpela trening

long ol yangpela meri na ol gel long ol komyniti.

I gat 6-pela meri PNG i stap insait long dispela lidasip program we tripela meri husat i makim Ragbi Lig em Bertha Bade, Cathy Neap na Grace Wilson Michael. Lua Rikis i makim Netbal, Sulueti Tarasomo i makim Spots Faundesen na Susan Komang i makim Keiket.

I gat 4-pela meri Fiji i stap insait long lidasip program em Lavenia Yalovi i makim Soka, Maryann Moss i makim Etletiks Komisin, Mherina Ahmed i makim Gymnastiks na Siteri Tadrau i makim AFL.

Wankain tasol, 4-pela meri Samoa husat i makim 4-pela spot em Filoi Eneliko i makim Ragbi Yunion, Lepa Fa'aiuasao i makim Ragbi Lig, Nyntee Sass i makim Seiling na Ruta Schwalger i makim Netbal.

Peti Tupouniua bilong Tonga i makim Badminton na Salote Sisifa i makim Netbal, na Saria Stephens bilong Vanuatu i makim Volibal na Brenda Ribauw bilong Nauru i makim Etletiks.

Program i lukluk tu long promotim na skruim namba bilong ol meri i go insait long lidasip wok long spot na long ol narapela hap tu.

Seeto amamas long pilai bilong PNG



(Long lep han) Jackson na David Seeto wantaim ol medol bilong ol. Poto: Internet

Paul Zuvani i raitim

WANPELA man husat i makim PNG long ol wetlifting pilai bipo long Indipendens i tok em i amamas long mak we Papua Niugini pilai i go long em.

David Seeto, husat mama i karim em long Rabaul, Is Nu Britan, tasol nau i stap long Brisben, Australia i mekim dispela tok taim em i kam long Mosbi long las wik.

Em i kam long wanpela indaksen o luksave PNG Olimpik Komiti (PNGOC) i givim long ol pilaia olsem lejen husat i mekim nem bilong Papua Niugini long ol pilai bipo.

Ol foapela lain husat i kisim luksave wantaim David em Nigel Cluer, Tumat Sogolik, Salitia Pipit na brata bilong David, Jackson Seeto.

Dispela luksave i namba tu taim PNGOC i givim kain awod olsem.

Namba wan taim kain luksave i kamap em long taim PNGOC i givim long Sir John Kaputin na Edward Laboran long 2011.

Wantok Niuspepa i bin toktok wantaim em taim em wantaim meri bilong em, Elizabeth, i kam long wantok opis long las wik Fraide.

“Mi amamas long mak Papua Niugini i pilai long em long wanem long bipo mipela i no planti lain i save go aut na pilai,” Seeto i tok.

Em i tok em i no gat wanpela save long wetlifting inap long Eric Evans bilong Hoskins i go long Rabaul na soim ol olsem i wetlifting i wanpela spot na olsem ol bai tren olsem long kamap long spot.

“Nau yu gat ol gutpela ples bilong tren na ol gutpela kosa long skulim yupela. Long taim bilong mipela, no gat ol kain samting o man-meri olsem na mipela i save hatwok o tren bihainim wanem samting i stap long tingting.

“Nogat kosa na mi save lukluk long bikipela glas long tren,” em i tok.

Seeto i save pilai long 56 kilo grem.

Ol pilai na taim em i makim PNG em:

- Britis Empaia Gems (Komenwel Gems) long Perth, Westen Australia long 1962;
- Saut Pasifik Gems (Pasifik Gems), Nu Kalendonia long 1966 we em i winim silva medol bihain long brata bilong em Jackson i winim gol medol;
- Long Pot Mosbi Saut Pasifik Gems (1969) em i winim gol medol;
- Long Tahiti Saut Pasifik Gems (1971) em i winim gol medol na
- long Guam Saut Pasifik Gems (1975) em i no winim wanpela medol.

David i go long Brisben, Australia long 1983 wantaim famili bilong em. Jackson i stap yet long Kimbe, Wes Nu Briten.

PNGOC i sapotim ol lain i stap long GPS Program



Ol lain husat i stap insait long GAPS Program.

PAPUA Niugini Olimpik Komiti (PNGOC) i sapotim 11 lain husat i stap insait long GAPS Program long Gold Coast, Australia.

Program em ol i ranim aninit long Griffith Yuni-veseti na Komonwel Gems Federesen i sapotim dispela. Program i lukluk long ol Osenia Komonwel kantri na i lukluk long bikipela kala wantaim etlit na kosa husat i stap insait long spot program sesen ol i bin mekim long improvim save bilong ol na wok long bikipela wok olsem helt na trening.

Papua Niugini Olimpik Komiti i tok gut bai long ol 11 lain long las wiken taim ol i lusim PNG long go long Griffith Yunivesiti, Gold Coast, long namba wan sesen bilong ol tripela sesen

bai kamap. Dispela sesen bai kamap insait long 18 mun long stat i go inap long Gold Coast Komonwel Gems.

Taim ol i tok gut bai long ol 11 lain makim PNG, Deputi Seketeri Jenerel bilong PNGOC, Andrew Lepani, i strongim ol lain bai stap insait long program long kamapim dispela program olsem wanpela bikipela sans long skul na lukluk long ol bai yusim dispela save long taim ol i mekim wok bilong ol yet.

Namba wan sesen bilong dispela program i stat long Mande, Desemba 5, i go inap long Desemba 9 na namba tu sesen bai kamap long namel bilong yia 2017 na fainal sesen bai kamap long stat bilong yia 2018.

Ol lain PNG husat i stap

insait long dispela program em ol etlit na kosa long boksen, etletik na nambis volibal. Ol i lukluk long putim planti kala na kisim wanpela ples long Tim PNG long go resis long Komonwel Gems.

Na tu, ol i stap insait long dispela program em long kisim wanpela ples long Tim PNG resis long Pasifik Mini-Gems bai kamap long Desemba 2017.

Gol medal wina long Nambal Valibal long 2015 Pasifik Gems, Moha Mae, i tok tenkyu long dispela sans na i tok, “Mi lukluk long stap insait long GAPS program na ol samting mipela bai lainim long program bai helpim mipela long rot bilong mipela long go long Gold Coast Komonwel Gems long 2018.”

Natto i tokim FIFA long mekim wok painimaut

PRESIDEN bilong Hekari Soka Asosiesen, John Kapi Natto, husat ol i bin rausim em pinis i tokim FIFA Etiks Komiti long mekim wok painimaut long raun bilong memba bilong PNGFA husat ol i bin makim long pinis bilong mun i go.

Kapi Natto, husat i stronpela kendidet i resis long kisim sia bilong nau presiden, David Chung, long PNGFA ileksen i tok strong olsem ol i bin kontrolim olgeta samting long bungim bel hangere bilong wanpela man tasol.

“Ol i bin ranim ileksen bikos ilekterol kod em ol i bin yusim olsem wanpela risen long rausim memba asosiesen long taim bilong vot,” Kapi Natto i tok.

Bos bilong Hekari i tok, i no gat wanpela astingting i stap long ol bai bungim Os-

enia Futbal Konfederet olsem dispela ogenaiesen i stap aninit long Chung olsem em i presiden.

Em i tok, Chung bai asua long em bai mekim sampela toktok taim ol i bringim sampela toktok bilong PNGFA i go long em.

“Mipela i nidim FIFA Etiks Komiti long kam na mekim wok painimaut long PNGFA na ilekterol kod bilong PNGFA ileksen bai kamap long Desemba 28,” Kapi Natto i tok.

Kapi Natto i tok strong olsem ilekterol kod vetting em ol i bin yusim olsem tul long rausim asosiesen nau edministresen i no sapot long en.

Em i tok moa olsem i gat planti asua i bin kamap long vetting proses.

Natto i tok em i gat sapot long 11 asosiesen olsem Lae,

Lahi, Mendi, Hekari, Wabag, Manus, Bougainville, Koupa, NCDPSSA, Madang na Tabubil inap long ol i bin rausim em long resis.

Kapi Nato i askim FIFA Etiks Komiti long mekim wok painimaut long dispela bipo long asembli long Kimbe.

Presiden bilong Manus, Jack Changau, wantaim Geob Gairiki bilong Lae, Andrew Narik bilong LFA na Francis Ank bilong Mendi i wanbel na tok strong tu olsem etik komiti i mas go insait na lukim we PNGFA i gat sampela toktok long bekim na em bai mekim ol wankain samting long stre-tim ol dispela asua.

Changau i tok olsem ol i bin rausim tripela asosiesen, Hekari, Bougainville na Koupa em i de nogut bilong futbol long kantri.

PNG i kisim bikpela helpim

PAPUA Niugini i kisim bikpela helpim ausait long pilai graun bikos long ol i lukautim 2016 FIFA Anda 20 Wol Kap resis bilong ol meri na medikal ligesi program em i bikpela samting moa. FIFA i redim USD \$250, 000 fainensel sapot i go long Papua Niugini 2016 Lokal Ogenaising Komiti long givim medikal sevis na sampela moa medikal ikwipmen long stat bilong tonamen i go inap long pinis bilong en.

Aninit long fainensel sapot we FIFA i givim long en, ol i bin baim ambulens sevis, haus sik sevis na ol bai stretim Imejensi Dipatmen bilongt Pot Mosbi Jenerel Haus Sik. Ol ikwipmen ol i bin yusim long taim bilong tonamen em ol bai givim i go long ri-jonal futbol asosiesen na ol pablik haus sik we sampela bai go long balus o bot na go bungim ol. Dispela bai helpim ol long

mekim gut long medikal ke bilong ol futbol pilaia na ol bai gat namba wan medikal pilai graun long Papua Niugini. “Dispela ol ikwipmen i bilong sevim laip na ol bai gat bikpela senis long ol komyuniti insait long kantri. Mi gat bikpela amamas olsem futbol na dispela tonamen bai lusim bikpela namba wan samting long Papua Niugini,” Presiden bilong Papua Niugini Futbol Asosiesen, David Chung, i tok.

PNG i kisim biknem



FIFA na LOC i givim jenerel tingting bilong ol long taim bilong FIFA Anda 20 Wol Kap resis bilong ol meri long Stanley Hotel long Mande, Desemba 1.

SIAMERI bilong FIFA Anda 20 Wol Kap Ogenaising Komiti bilong ol meri na memba bilong FIFA Kaunsil, Sonia Bien Aime, FIFA Menesa bilong Wimen's Kompitisen, Rebecca Smith na CEO bilong Papua Niugini 2016 Lokal Ogenaisin Komiti (LOC), Seamus Marten, i tok olsem risal bilong tonamen i kamap long Papua Niugini em i namba wan. Resis i pinis gut na dispela gutpela kala bilong lukautim pilai bai stap long Papua Niugini. Aime i tok tenkyu long gavman bilong Papua Niugini long sapotim futbol resis bilong ol meri long dispela namba wan kantri. “Mi tok tenkyu long gavman bilong PNG i sapitim futbol resis bilong ol meri na tok tenkyu tu long LOC long hat wok na taim bilong ol. “Ol pipel bilong PNG i soim yet olsem ol i gutpela lain long poroman wantaim narapela pipel na gutpela lain tu long lukautim ol bikpela gem bikos mi lukim olsem dispela tonamen i stat gut na pinis gut,” Aime i tok. Em i tok moa olsem, “Mipela i lukim planti ol kempen i kamap long pilai

graun i strongim ol gel na meri long brukim ol banis na stopim vailens. “Mi tok tru olsem dispela tonamen i givim strong long ol wan wan gel husat i laik pilai futbol i ken go het na pilai. “Mipela i gat moa long 1,000 pipel i kisim trening aninit long risal bilong dispela tonamen na nau ol i ken painim wok. Dispela i lukim olsem planti pipel i winim sampela gutpela mak long dispela tonamen.” Long wankain taim, Rebecca Smith, i tok tu olsem tonamen i kamap long mak gut tru. Planti lain i soim amamas bilong ol long taim bilong resis na ol tim tu i soim namba wan kala bilong ol na dispela em i positiv ekspiyens we ol opisal na pilaia bilong ol narapela kantri i luksave long PNG. “Ol hap bilong pilai tu i kamap namba wan na ol sapota tu i stap baksait na sapotim olgeta tim. Dispela i soim olsem PNG i gat gutpela kala long lukautim moa tonamen long bihain taim. “PNG Futbol Stediam em ol meri tasol i bin lukautim na dispela em i wanpela samting mipela i no save

lukim long ol Wol Kap resis i save kamap bipo,” Smith i tok. Seamus Marten i tok moa olsem mipela i ken amamas bikos Pot Mosbi siti i sanap pinis olsem futbol famili we PNG Futba Asosiesen i go pas long dispela resis. “Mi gat bikpela amamas long ol pipel bilong PNG soim kala bilong Papua Niugini na i gat bikpela rispek long dispela tonamen. “Mi ting olsem ol tim na opisal husat i kam long taim bilong resis i lusim sampela gutpela memori long kantri na tonamen. “PNG i givim ol stediam i go long Futbol em i wanpela samting i no save kamap bipo. “I gat ol mini futbol program i kamap long olgeta hap bilong kantri we ol i lukluk long kamapim ol yangpela gel long pilai futbol. “Na tu, i gat planti FIFA projek na ekademi bai kamap we wanpela long Kimbe em i bilong futbol bilong ol meri. “Mi ting olsem ol dispela samting i kirapim tingting bilong ol yangpela na ol i kisim moa strong long pilai futbol long bihain taim,” Marten i tok.

Korea DPR i winim driman bilong ol



Ol pilaia bilong Not Korea i amamas wantaim tropi bihain long ol i winim 2016 FIFA Anda 20 Wol Kap resis bilong ol meri.

NOT Korea i winim 2016 FIFA Anda 20 Wol Kap resis bilong ol meri bihain long ol i daunim ol Frans, 3-1, long fainal resis i bin kamap long Nesenel Futbol Stediam long las wik Sarere, Desemba 3. “Mi gat bikpela amamas long mipela i kamap wina, tasol mipela bai no inap stop long hia. Mipela bai wok hat yet long winim sampela

moa taitel,” Kosa bilong Korea DPR, Hwang Yong-Bong i tok. Ol Frans i opim skoa long fainal resis, tasol ol Korea DPR i strongim banis bilong ol na pilai strong long daunim ol Frans wantaim tupela poin. Ol Frans i putim wanpela gol pas i lukim olsem ol i ken apim tropi tasol namba wan

pilaia bilong Not Korea, Les Bleuettes, i soim gut kala bilong em long mekim Not Korea i kamap wina. Kosa bilong Frans, Gilles Eyquem, i tok, “Bikpela samting em mipela i bin pilai egensim ol sampela strongpela tim na dispela em i bikpela ekspiyens long ol dispela pilaia husat ol i pilai egensim ol senia tim.”



Tim Frans i go lukim Fisaman Ailan long taim bilong FIFA Anda 20 Wol Kap resis bilong ol meri.

Japan i pinis namba 3



Jessie Scarpa bilong Yunaitet Stet i lukluk long danim Chika Hirao bilong Japan long fainal resis bilong kisim namba 3 ples long 2016 FIFA Anda 20 Wol Kap resis bilong ol meri.

JAPAN i daunim tripela taim wina bilong resis, USA, na pinis namba 3 long 2016 FIFA Anda 20 resis bilong ol meri. USA i gat liklik astingting long amamas wantaim kala

bilong ol long Papua Niugini. Bihain long ol i mekim bikpela hat wok long kwalifai long Grup C, ol i no bin pilai gut long semi fainal we ol Korea DPR i daunim ol.

Wankain taim, ol namba 3 ples, Japan, i no pilim amamas taim ol Frans i daunim ol long semi fainal, tasol ol i strong moa long kisim namba 3 ples.



Anda 20 FIFA Womens Fainal 2016

Not Korea kisim Kap France kam namba 2, Japan kam namba 3 na USA kam namba 4. Dispela em namba 2 taim Not Korea i kisim Kap bilong FIFA Anda 20 bilong ol meri. Ol bin kisim Kap long 2006 taim ol i pilai wantaim China long Russia.

France tim i stat long go insait long fainal bilong

FIFA Women Anda 20, ol i bin stap insait long fainal long 2008, 2014 na nau 2016 na ol i wok long kamap strong moa yet. France nau bai lukautim FIFA Anda 20 Women's Wol Kap long 2018.

USA i stap insait long olgeta fainal taim FIFA Anda 20 bilong ol meri stat long 2002. Ol i bin misim fainal

long 2010 na 2014 na kam bek gen long 2016 long Pot Mosbi.

Japan tim em namba tu taim ol kamap namba 3 ples. Ol i bin kam namba 3 ples long 2012 taim ol bin lukautim dispela Anda 20 FIFA Wol Kap bilong ol meri na dispela 2016 long Mosbi ol kam namba 3 gen.

LUKIM OL POTO BILONG 4-PELA TIM LONG FAINAL PILAI LONG NFS LONG MOSBI.

Poto na Stori: Nicky Bernard





DIANA White
Barbecue Flavour

WHITE TUNA insait
K 2.20

Tasty and Flavourful White Tuna for Everyone!

Manufactured by:
RD Tuna Canners Ltd.

PNG i lukluk long lukautim 2028 Komonwel Gems

PAPUA Niugini i lukluk long lukautim 2028 Komonwel Gems bihain long 2015 Pasifik Gems na 2016 FIFA Anda 20 Wol Kap resis bilong ol i meri pinis long mak gut.

Gavana bilong Nesenel Kapitel Distrik, Powes Parkop, na Minista bilong Spot, Nesenel Iven na APEC, Justin Tkatchenko, i bin tokaut long dispela long Tunde long PNG Futbal Stediam.

Gavana Parkop i tok, taim i kamap klostu nau bi-long Komonwel Gems bai kam long liklik ailan kantri long Pasifik.

"Mipela i lukluk long bid long 2028 Komonwel Gems, na sapos ol i no tok orait long mipela em mipela bai bid long Yut Olimpik resis," Parkop i tok.

Mipela i kamap bikipela siti na i gat inap hap bilong resis we mipela bai stap long bikipela level wantaim

spot na ol narapela intenesenel iven."

Em i tok, "Yumi bai no inap long grisim ol long givim yumi 2018 Komonwel Gems long lukautim, nogat. Mipela inap long lukautim bikos yumi bin lukautim 2015 Pasifik Gems pinis na dispela em i wankain olsem Komonwel Gems we mipela bai lukautim gut tru."

Long wankain taim, Minista Tkatchenko i strongim olsem ol trasti o ol lain husat i save lukautim Nesenel Futbal Stediam bai skruim na mekim stediam i kamap bikipela bipo 2017 Ragbi Wol Kap resis bai kamap long kantri.

"Ol lain husta i makim Nesenel Futbal Stediam i bin toktok pinis wantaim Ragbi Wol Kap long mekim pilai graun i kamap bikipela long tupela sait.

"Mipela i lukim olsem



hangere bilong ol pipel long lukim pilai bai kamap bikipela na long dispela astingting, mipela i bin toktok long skruim sia i go antap long 20,000. Ol bai skruim

5,000 moa sia bipo long Oktoba bilong yia i kam," Tkatchenko i tok.

Em i tok moa olsem ragbi em i nesenel spot bilong mipela na planti sapota bai

gat bel hevi bikos spes i liklik. Ol bai traim long kama-pim moa spes we ol pipel bai gat inap spes long lukim gem na sapot tim bilong ol long asples.

Gavana bilong Nesenel Kapitel Distrik, Powes Parkop, na Minista bilong Spot, Nesenel Iven na APEC, Justin Tkatchenko, i sanap wantaim long Nesenel Futbal Stediam.



*** Treated Mosquito Nets PREVENT Malaria**

*** Visitect TESTS for Malaria**

*** Arterakine Tablets TREAT Malaria**

Good Products, Better Prices, ikam long



Johnstons Pharmacies Ltd

P.O.Box 1066, Boroko, Papua New Guinea.

Email sales@johnstons.com.pg